



TAPAK 9

Modi sorkar yimsüsüba kübok sensakertem timtemer: Yechury

TAPAK 10

Islamic States anema raraba nung NATO atentsü: Stoltenberg

VOL. XIV NO. 217 (ADOK 217)

DIMAPUR

FRIDAY

MAY 26, 2017

5.00

Naga nungertem ya tangari mesüzüka anir aotsü temela

Kohima, May 25 (TYO): Naga nungertem ya tangar nem mesüzükdakja tangaleni anir aotsü temela, anungji tsürabur aser taintemi tetsür aser tebur chanutem taküm ya jungjunga reprangtsüla, ta Nagaland State Commission for Women (NSCW) nung Mendenbula Dr.Temsüla Aoi metetdaksü.

Lai iba o ya yashi Bodbar nü Phek nung 'Human Trafficking' dak aketba temzüng ozüing indang shisalemsatepba sentong ka nung jembidang metetdaksü. Iba sentong ya NSCW teloki National Commission for Women, New Delhi den yaritepa ayongzükba liasü.

Naga nung asoshi tia tajung kaji lokti tentet aika lir aser item lokti tentetem jagi tanurtem taküm kümzüka ayutsüba maparen nunga kanga yarir ta

laisa metetdaksü.

Iba amaji asenoki lanurtem asoshia inyaksüla ta laisa ayongzük.

Tanü asüing nisung aikati teyari tajung agia anepaludaktsütsü asoshi tanurtem bendangleni yoker ajisüaka itemji aika tanurtem angati yaritsü tenüing nung tiyazü jembia parnokji alar küma amshir, anungji item nung jagi jembua alitsüsa tsüraburtem kanga kümdangtsüla ta laisa ashi.

Kodangsa kidang alir tanurtem dak mejungi benshiba osang angashidir, item osangji bangdak nung alirtem nem metetdaksütsüla ta Dr.Temsülaisa ashi.

Iba sentong nung kasa onük nung Coordinator-cum-Master Trainer, NSLA, Akumla Longchari-i jembia .liasü.

Tanü Assam nung PM Modi-i India nung apu talangtiba lapoktsütsü



Guwahati, May 25 (Agencies): Hokolbarnü Assam nung Ato kilonser, Narendra Modi-i linük nung apu talangtiba, Dhola-Sadiya apu lapoktsütsü.

Brahmaputra ayong nung yangluba apu ya ajanga Assam aser Arunachal Pradesh state na Lohit ayong ajanga sendakteptsü. Iba apu ya ajanga state ana tsüingda tamalen ghonda trok indoka ainlen senzüba mapang kümzüka ghonda ka dang agitsü.

Kilometer 9.3 talang apu ya sen crore 2,056 intoka yanglu aser iba apu ya ajanga Arunachal Pradesh nung Dhola aser Assam nung Sadiya na sendakteptsü.

Iba apu yangluba ajanga Assam, Rupai nungi Arunachal nung Meka, Roing tsüingda kilometer 165 tajemba kümdaktsür.

Iba apu yangluba ajanga Northeast nung anogoshia totzü nung intokba sen lakh 10 shi kümzüktsü, ta Road ministry-i

asadangtetogo.

Tang linük nung apu talangtibaji Mumbai kübok Mahim Bay nung lir, aser tang Navayuga Engineering Co. Ltd-i yangluba Dhola-Sadiya apu ya kilometer 3.55 agi Mumbai nung aliba apu dang nungi talangba asütsü.

Iba apu ya 2011 küm yanglu tenzük aser 2015 küm tashi nungbo renemtsü sentong liasü, saka küm ana tali agisemogo.

Kasa anogo nungsa Ato kilonser, Modi-i Dhemaji district nung Indian Agricultural Research Institute (IARI) amenoktsü aser Guwahati kübok Sarusajai nung All India Institute of Medical Sciences (AIIMS) amenoktsü atema lung azünga yutsütsü.

Assam nung BJP sorkar küm ka ajungba aser BJP-i aniba NDA sorkar küm asem ajungba benjungmung tenzükja Ato kilonseri Guwahati nungi linük nüburtem den jembitsü.

Nagaland nung kibong 88.6% nung metsümeshidak junga yanglua lir



Kohima, May 25, 2017: Brihostibarnü Kohima nung sorkar, corporate aser nübortem tsüingda longjemer linük merükmejutsü atema inyaksü shisalemsatepba senden amenba noksa nung angur.

Kohima, May 25 (TYO): Tang tashi nung Nagaland nung kibong 88.6 % nung metsümeshidak junga yanglua lir saka item ama merükmejuba mapaji yimya sübaa kibur küma inyaksü aser nisung shinga tesem mashimashi nung metsümeshi masütsü asoshi tangatetba agütsütsü ano kanga nüingdaka lir, ta tanü PHE department nung ketdangsertemi metetdaksüogo.

PHE Department osang ajanga ashiba agi, tang tashi nung parnokji Nagaland nung district trok kübok yimtsüing 302 tashi tonga oagi reprangdangogo aser item yimtsüingtem nungji putu mendeni ashiba ama kibong shia nung metsümeshidak junga yanglua liasü. Item district trokji Dimapur, Kiphire, Longleng, Phek, Zunheboto aser Mokokchung liasü. Item district-tem nung ya June ita tatem tashi nung shinga tesem mashimashi

nung metsümeshi masütsüsa ajak kidang metsümeshidak yanglutsü nükjidong yua lir.

Iba onük ya tanü Brehostibar nü government, corporate aser nübortem rongnung tangatetep aser telongjem ka nung külem ser linük merükmejutsü indang jembiba ya nübortemi ajungai jangrabangraa inyakba mapa ka kümdaktsütsü asoshi anogo ka monga Civil Secretariat, Kohima nung shisalematepba sentong nung jembidang metetdaksü.

Iba sentong ya Nagaland government kübok Public Health Engineering Department den longjemer North East Initiative Development Agency (NEIDA), Tata Trusts ajanga inyakba, aser Federation of India Chamber of Commerce & Industry (FICCI), ibai India nungbo Chamber tulutiba nungertem longjemer ayongzükba liasü.

Iba sentong lapokja jembidang,

Deputy Director General, Union Ministry of Drinking Water & Sanitation, Hiranya Borah-i Nagaland nung nübortemi metsümeshidak tajungba yanglua amshitsübaji tongtubang kümogo, kechiyong iba jagi nisungtem anema lidaktsütsü.

Nagaland ya India nung tanga state-tem den apitep nungbo temerük state ka lir, anungji tangar dang tama taküm küm October ita tashi nungbo Nagaland nung kibong ajak nung metsümeshidak yanglua amshitetsü imlar ta paisa ashi.

Tang ya balaka linük nung merükmejutsü indang jembiba agi, company aser corporation aikati nübortem asoshi pei rongsen nung shilem ka agiteta linük nung metsümeshidak yangluba maparen nung yaridagi aser item teyari angurtem rongnung Nagaland ya ka lir ta paisa ashi.

(Maneni tapak 11 nung...)

Mkg nung "World Environment Day" sentong tulu ayongzükba amungtsü

Mokokchung, May 25 (TYO): June 5, 2017 nü "World Environment" sentong tulu ka Mokokchung town hall nung ayongzükba amungtsü lir, ta District Forest Officer, Mokokchung Wb. T.N Jamiri sangdong ka ajanga metetdaksüogo.

Iba sentong ya Nagaland Environment Forests & Climate Change Minister Wb. Imkong L Imchen lenisüba nung Nagaland Legislative Assembly Speaker Dr. Imtiwabang Aier tongti tesemdang ka ama arua shilem agitsü, ta osang ajangasa

metetdaksü.

Iba sentong nung Aor yimtsüing ajak nungi council züingsem, VDB züingsem, Mokokchung district kübok head of the department ajak, Ao Senden, Watsü Mungdang, Ao Kaketshir Mungdang (AKM), Mokokchung Town Lanur Telungjem (MTLT), Fazl Ali College aser nija college-tem, All Ward Union Mokokchung Town, Adhoc town committee

- Tuli/Mangkolemba/ Changtongya aser Aor lokti tentet ajak nungi teshimtet nübu

arua adentsü asoshi Mokokchung DFO-isa ayongzükba metetdaksü.

Kasa sentong nung; alima tzü mopung melenshiba (Climate Change), arem shiruru koda wazüka aser kümzüka ayutsü (Wild life conservation), Village Council-i alima tzü mopung aser arem wazüka ayuba nung agitsü shilem, tekong lu (jhumming) koda tajangzük keta ayimtsü, ta asüba onüktem nung shisalen sayurtem jaoka shisatokden ka akatsü, ta osang angazüker.

Manipur Rajya Sabha election nung BJP-i takok angu

Imphal, May 25 (Agencies): Brihostibarnü Manipur nung Rajya Sabha menden ka atema election agiogo aser iba election nung state BJP unit Tir, Khetrimayum Bhabananda-i

takok nguogo, ta ketdangsertem osang ka ajanga metetdaksü.

Bhabananda-i Opposition party, Congress candidate, ElangbamDijwamani madak vote tali 18 agi takok angu.

Züingsem 60 aliba Manipur assembly nung Bhabananda-i vote 39 aser Dijwamani-i vote 21 angu. Assembly nung BJP aser par teloktep party senteper züingsem 38 lir.

Lord of Rocks-i Mkg nung concert agutsütsü yongyar



Lord of Rocks band züngsemtem den achayanger aser tayongertem külemi tangokba noksa nung angur.

Mokokchung, May 25 (TYO): May 27 Honibar aonung 6:00 ako nungi tenzüka Mokokchung town hall nung 'Lords of Rocks (LOR)' ta sür classic rock jangrar telok kati concert agütsütsü asoshi mazüngi ken bushitepdar.

Iba aonung LOR teloki 1980's rock n' Roll music nungi ken balala atentsü terenemba lir. Iba aonungji parnoki atenba ken kar den ano Mr. Big, Metallica, Skid Row, Bon Jovi, Guns & Roses, Extreme, Fire House aser ano nüburtemi sapuba kensep balala nungi atentsü, ta osang angazüker.

Mokokchung ama rock

music meimba yimti ka nung concert agütsütsü onoki kanga yongyar aser mapang talang nungi onok terenemba tulu lir, ta LOR nung ken atensang, Clemant Imsong-i osangbener senden ka The Restaurant Mokokchung nung alidang ashi. Nagaland nung Rock music indang jembidang, Mokokchung ya mezüngpurtem, iba yimti nungi Squadron ama rock band tajung aika adokba den rock n roll tsütsü kanga nüngtugu yimti ka lir, anungji nüburtemi iba kenten sentong nung arua shilem agitsü onok teimla tulu lir, ta paisa ashi.

Iba yimti nungi tenzüka

Nagaland den India lima tesem balala nung kenten sentongtem ayonga jajatsü onok tebilemba lir, ta paisa ashi. Tarutsü nung onok jurila kensep-a adoktsü tejangraba lir, ta paisa shisem.

Iba telok nung ken atener aser kongki atemertemji; Clement Imsong (vocal), Akihito (Bassist), Alem Ozzy (drummer), Toshimoa (Guitarist) aser Aküm Jams (Guitarist) nungertem lir. Par telok ya Rockstar EI Pvt. Ltd-i anepalua achaayanger. Parnok ya taoba mapang band balala nung shilem agir takutet musician-tem dang lir. Par telok nung Band Manager-ji Poland nungi Mike Miruki lir.

Honibar aonungji Mokokchung nungi local band 'Mannequin' aser 'Rag Dolls' natia shilem agitsü, ta angazüker. Mokokchung nung alir aikati 80's rock music memeimerbo malitsü südi, anungji, iba aonungji tangu sadoka orr reprangang, iba kenten sentongji ghonda ana shi dang asütsü.

Tejangrartemi Mokokchung Cosmos Hall aser Aria dokan nungi ticket alitsü akok aser ticket jenjangji senpak 300/- dang asütsü. Mokokchung nung iba kenten sentong ya 'Temulunger Telok' den yaritepa ayonger.

Assembly mapang Kma nung traffic ozüngtem sangdonger

Kohima, May 25 (TYO): May 27, 2017 nü 12buba Nagaland Legislative Assembly 16buba (Special) senden nung ajemdaker security maparen dak sendakba nung traffic ozüngtem melenshiba osang ka Sr. Superintendent of Police Kohima, Nagaland ajanga metetdaksüogo.

1. Car passes aliba garitem dang Assembly Secretariat telungi aittsü melatsü.

2. Assembly agiba mapang nung anepdang 6:00 ako nungibo tsünglangen aliba gari lenmangtem tezülen gari anena

ayutsü memelatsü:

(a). BSNL Telephone Exchange nungi Classic Island tashi.

(b). Raj Bhavan nungi M.S Classic Island tashi.

(c). Classic Island nungi Razhü Point adena Assembly Secretariat tashi.

3. Assembly agiba mapang sorkar department bus tem dak alaka gari tulutem High School junction nungi Sanuoru subway adena Assembly Secretariat tashi senzütsü memelatsü.

4. Anepdang 7:00 ako nungi tenzüka Assembly senden

matem tashi Kohima jila nung gari tulutem senzütsü memelatsü. Kohima jila nung gari tulutem nungi khu loading aser unloading ji anepdang 7:00 ako tashi nungbosa tembanga inyaktsüla.

5. Gari tulutem "D" Block road nung anena ayutsü memelatsü.

Nüburtemi amalitepa inyaktsü imlar, iba den külemi ozüng alema inyakba garitemji police-i atsüer aotsü aser gari kiburtemi senchi agütsütsüsa akümtsü, ta kasa sangdong ajangasa metetdaksü.



Mokokchung, May 25, 2017: Brihostibarnü The Greensight Project züngsemtemi Mokokchung district kübok Mopungchuket-Milak lenmang nung 'ornamental' süngdongtem temtsüba sülen tangokba noksa nung angur. Parnoki maple aser royal poinciana süngdongtem den sobaliba arem süngjanglijang süngdongtem temja liasü. Parnokisa yaküm temtsüba süngdongtem melenba den külemi süngdongtem anepalua azüa yutsü. The Greensight Project ya küm pongu scenic enhancement programme ka lir aser iba ya 2016 küm July ita nung Mopung kaketshir telongjem, Mopungchuket Ait Laishir Telongjem (MALT)-i achaayanga tenzük. Kilometer 11 lenmang ya tepor junga yanglutsü nükjidong nung MALT-i iba project tenzüka liasü.

May 27 nü Kma nung aliba office tem lapoktsü

Kohima, May 25 (TYO): Tanü Home Department-i sangdong ka ajanga, Nagaland Assembly special Session aliba nung ajemdaker Nagaland sorkari May 27 nü (Honibarnü) ji Kohima nung aliba office tem

ajak mapa inyakba anogo asütsü, ta metetdaksüogo.

Iba dak sendakba nung Administrative Heads aser Heads of Department ajak dang peipei ketdangsertem aser staff tem tenüng ajatsü metetdaksüogo.

June 2 nü ASLB pur jateper

Mokokchung, May 25 (TYO): 2017 nungi 2022 kümsük atema Ao Senden Literature Board (ASLB) züngsem shimer külen mezüngbuba metetpela senden ka June 2 (Hogulbar), 2017

anepdang 10:00 ako nungi ASLB Kimen Y. Lanutemjen Imchen (Süngkomen Ward) kidang alitsü, anungji, züngsem ajak medema arutsü mepishir, ta ASLB sangdong ka ajanga metetdaksü.

BCS leniri Nagaland Angh ajuru



May 25, 2017 nü Raj Bhavan, Kohima nung Nagaland Angh, PB Acharya aser Burma Campaign Society Chairperson, Akiko McDonald na tangokba noksa nung angur.

Kohima, May 25 (TYO): Brihostibarnü Raj Bhavan, Kohima nung Burma Campaign Society (BCS) Mendenbula, Akiko McDonald-i Nagaland Angh, PB Acharya ajuru liasü.

Iba senden nung Akiko-i Angh dang, BCS-i putiotsütem, rara mapang otsütem, noksatem aser film tem bendentsü aser alima nüburtem nem agütsütsü

nükjidong lir, ta metetdaksü. Society-isa Japan, India, Burma aser UK linüktem nung war memorial sentongtem nung shilem agitsü nükjidong lir, ta laisa metetdaksü.

Burma Campaign Society mendenbulaisa May 24, 2017 nü Nagaland Chief Minister, Dr. Shurhozelie Liezietsu-a ajuru liasü.

Longkumer Gas Agency-i metetdaksür

Mokokchung, May 25 (TYO): LPG refill alidang subsidy sen consumer account-i aiba ya central sorkar nungi indang-indanga agütsür, aser iba subsidy angutsü asoshi teinyaktsü kar lir, ta Longkumer Gas Agency (Mokokchung) ajanga nüburtemi meteta alitsü asoshi sangdong ka agütsü.

Teinyaktsü rongnung mezüngbubaji; consumer bank account aser Adhaar number-ji Longkumer Gas Agency nung arua agütsütsüla (link asütsü atema). Tanabuba nung; mobile phone nung SMS arutsü asoshi, bank nung nenok number

register asütsüla, aser tasembuba nung consumer karbo bank account aika alitsü, Nagaland Rural Bank dak alaka, nenok Adhaar bank nung linked süa lira, central sorkari nenok bank account mashie ka nung subsidy-ji inoktsütsü.

Anungji, LPG refill asüdag subsidy aginürtemi temalen agüja aliba teinyaktsütemji inyaktsüla. Iba dak sendakba nung mangatetba aser timtem kar danga lira, Longkumer Gas Agency nung arua tongteprateptsü mepishir, ta kasa sangdong nungsa metetdaksü.

Dimapur Ao Lanur Telongjemi senden ayonger

Dimapur, May 25 (TYO): Dimapur Ao Youth Organisation-i May 27, 2017 nikongdang 2:00 ako nungi tenzüka Senyur kidang teloktep senden ka ayongzükogo, anungji iba senden nung office ketdangpurtem, Executive züngsemtem, Advisor tem, Unit Tirtem, Grievances Cell Committee aser Entrepreneur Development Committee

züngsemtem medema arua adentsü mepishia metetdaksür, ta tanü Tir, K. Longri Imchen aser General Secretary, Meyatoba nati sangdong ka ajanga metetdaksü.

Iba senden metenzükdang Associate Pastor DABA, Rev.Wati Kichu-i ketdangsüa sarasadem sentong ka agitsü, ta sangdong nungsa shia lir.



Agartala, May 25: Trinamool Chatra Parishod(TMC) pur longkak aitba sentong ka nung Chief Minister Manik Sarkar mena aliba gari jakdang police den atsütepba noksa nung angur.

AYC-i GHADC ketdangsertem amokmeren

Tura, May 25 (Agencies): Garo Hills Autonomous District Council (GHADC) kübok mapa inyakertem ita 10 tashi itasen magütsüba dak sendakba nung, Achik Youth Council (AYC)-i iba tebilemsü ketdangsertemi mapang shidak nung anepalu mersür okadak ken o benoktsü ta amokmeren.

"Ita 10 tashi itasen mongoi parnok koda liteter? GHADC nung mapa inyakertem atema onoki aria bilemstür, parnok ita sen monguaka ita 10 tashi mapa kanga meranga inyaka arudar," ta tatongtir Silning D Sangma-i ashi.

"GHADC Non-Gazetted employee temi HC-i tetuyuba agütsüba tashi angaa longkak aitba anen. Ajisaka GHADC ketdangsertemi Meghalaya High Court-i tetuyuba agütsüba mapa küma meinyakteti ita 9 tashi parnok nem itasen magütsü," ta Silining-i ashi.

Parnoki itasen magütsübaji nisung ka temeden aginba maparen ka lir ta shia, GHADC ketdangertem aitsü.

Maneni HSSLC aser SSLC tatidang result adokba sülen tanurtem admission atema tsürapurtem senotsü nungdaka kümogo.

"Parnok tanurtem admission sütsütsü nungdaker aser aji dang masü kaket aser uniform balala alitsütsü nungdaker. Ita 9 tashi itasen mongoi liyonga aotsüba ya kanga tasak lir. Tanurtem school aser college tem nung admission magitetra GHADC-i iba khuret abentsü asü," ta NGO lenirtemi asüngdang.

"Okadak ajanga itasen magütsüma tashi ita anana lokteper agütsü tetuyuba agütsüba ama ketdangertemi agütsütsü asoshi nangzük saka parnoki ashioktsüogo. Telok anapronglai iba telemteba agizüka liasü saka telok kati

dang mapa küma inyak," ta Silning-isa ashi.

"GHADC puri parnoki aaba nungi danga mapa inyakertem nem itasen agütsüteta liasü. RTI ajanga ngutetba agi, GHADC puri 2014-15 atema sen 49, 52, 85, 354 agizük aser 2015-16 atema 48, 45, 53, 028 agizük. Maneni MVI atema 2017 Aprin 28 nü sen 3, 00, 84, 912 agizüka liasü," ta parnoki metetdaksüba den külemi item sen tem koloni aoer ta asüngdang.

"Lenla balala nungi sen paika ya aruaka mapa inyakertem nem itasen magütsüteter aser contractor tem nem agütsütsüba bill shilem 75 tashi magütsü lir. Sen ya koloni aoer?" ta parnoki asüngdang.

"GHADC ketdangsertemi okadak nungi tetuyuba ama mapa inyakertem nem mapang shidak nung itasen agütsütsü, ajida mesüra AYC-i okadak ken o benoktsü," ta parnoki amokmeren.

Meghalaya nung UDP aser HSPDP pur na longjemogo

Shillong, May, 25 (Agencies): 2018 Assembly election matong tsüngda Meghalaya nung regional party tongti ana; United Democratic Party (UDP) aser Hill State Peoples' Democratic Party (HSPDP) na longjemogo.

Iba telemteba ya party anaprongla pei pei sasep nung Central Executive Committee (CEC) senden amenba sülen tanü sangdong.

Inyakyim tebur jung asadanga aotsü nukjidong nung party ana yangi Coordination Committee ka kümtetogo aser iba nung UDP tir Dr Donkumar

Roy chairman aser HSPDP tir Ardent Miller Basaiawmoit co-chairman ta shimogo. Tanga tongtibang menden nung KH Shen secretary aser Allantry F Dkhar joint secretary ta shimogo. Maneni iba committee nung MLA, MDC tem den külemi taoba mapang Chief Minister, Bindo M Lanong züngsem asütsü.

Osangbenertem den jembidang Dr Donkumar-i ashiba agi, "Meghalaya nung nüburtem ajuntsü mechi nung onok Election madongtsüngda longjemogo."

Maneni state nung taoba

mapang nung regional party tem longjemba nung tamakok anguba tetuteta ashidang UDP tir-i, parnoki kasa aibelen masütsü ta ashi.

Maneni party ana longjemba indang jembidang, Dr Donkumar-i ashiba agi, party anapronglai pei tejangrabatem jakdang nübur tejangrabatem doktsür.

HSPDP tir Ardent Basaiawmoit-i ashiba agi iba telongjem meraksai aotsü atema par telok temolungtetba lir. Pai maneni iba telongjem ya UDP puri tanen makai inyakba ajanga kümtet, ta ashi.



Guwahati, May 25: 41buba National Arms Wrestling Championship nung medal angurtem nem Arms Wrestling Association of Assam-i Guwahati nung Brehostibarnü tenüngsang agütsüba sentong ka ayongzuka katsüdang tangokba noksa nung angur.

OFFICE OF THE MERANGKONG LANUR TELONGJEM

H. Q. Merangkong
P.O. Tuli, Dist. Mokokchung, Nagaland-798618

SANGDONGER

Merangkong Lanur Telongjem-i 16th May 2017 anogo nü Merangkong nung public meeting ka ayongzuka "Merangkong Nungger Ajak Putepba aser Longjema Alitsüla" nukjidong nung Ao-Hadang ground Longpong Ward Tuli Town nung sentepba liasü. Merangkong Lanur Telongjem ya political party tentet ka masü, mesüra kija aser lokti ka anema masü saka Merangkong sobaliba tajung wazüka ayutsü aser yimer ajak teputeb nung aser akumtsüputeba alitsü nukjidong nung iba telongjem nokdaka lir.

Merangkong litsü nung mapa tamajung inyakba aser yimer telongjem raksatsütsü merangba kuli tejangja ngua, item mapa tamajung inyakba nemjema odang doktsüra tsükchitep aser azü tokshitep agi asen lima ayatai tia-i ayitsü ajiteta Merangkong Lanur Telongjem-i item mapa tamajung anema nokdaka senso ka tenyaksü mapa ta ajiteta iba senden ayongzük.

Iba senden nung nubur ajaki molunga teka mekanga item telemteba agizüka renema ayu:-

1. Merangkong lushi nung shibai election dak sentakba nung sen lema senzüdir/ jajadir pa/la dak tapet temerenshi inyaksü aser kibur sangji-a kasa temzüng agi merenshitsü aser pa/la Merangkong lushi nung tetsüng majemmokdaksütsü (mapang telatet maka).
2. Merangkong lima raksatsütsü asoshi sen lema mesüra prangpong, injang bomb bener senso ka anema mapa tamajung inyaksü tasa-lendong inyakertem tatem tonga bushitsü aser taidok maka.

Sd/-
(WAPANGTEMJEN)
General secretary, MLT

Sd/-
(TEMSUMENBA)
President, MLT

NE states nung GST Bill agizükogo

May 25, 2017 (Agencies): Mizoram, Sikkim aser Tripura assembly tem nung tanü GST bill agizükogo. Brehostibranü anogo ka atema MLA tem special session ka mena Mizoram assembly nung Mizoram Goods & Services Tax (GST) Bill, 2017 ajaki molunga agizükogo.

Tripura nunga Brehostibarnü special assembly session ka nung Goods and Services Tax (GST) bill ajaki molungtepa agizükogo. Opposition Congress aser Trinamool Congress MLA temia iba bill dak sendakba nung kecha mashishi-i dang agizükogo. Anogo asem special assembly session amenba mezüng anogo Mongolbarnü nü iba bill ya Tripura Finance Minister Bhanulal Saha-i benok

asem telemteba kecha makai dang Brehostibarnü agizüka yuogo.

Kasa mapang nung 9buba Sikkim Legislative Assembly, Sixth Session (Part II) anogo ana buba nung Sikkim Goods and Services Tax Bill agizükogo. Iba bill ya 2017 bill No. 9 buba lir. State Legislative Assembly nung iba bill agizüka ayuba ajanga Sikkim ya India nung GST Bill agizükba state 16buba kümogo.

Maneni iba senden nung Sikkim Official Languages (Amendment) Bill, 2017 Bill No. 8 aser Sikkim Panchayat (Amendment) Bill, 2017 Bill No. 10 dena agizükogo. Iba bill asemprongla assembly nung Chief Minister aser Pawan Chamling nati benoka liasü.

KLO pur asem Tripura nung puogo

Agartala, May 25 (Agencies): Bodhbarnü Raishyabari tesem nung prangbong, injang, prangbong aser injang bener lia nisung asem puogo. Parnok asem ya KLO telungpur asütsü ta temolung melemi bilemba police-i metetdaksü.

Telungpur asem ya Tripura State Rifles (TSR) 12th Battalion nung sepai temi apu. Iba ken o dak sendakba nung asüngdang dang Tripura police nung ketdangser kati ashiba agi, parnok asem ya Bangladesh nungi India aitsü merang alidang apu.

Bushisüngdang ajanga ngutetba agi, KLO telungpur asem ya Assam kübok

Dibrugarh tesem nungi lir.

"Parnok asem ya prangbong, injang, Bangladesh nungger sen aser tanga tashishitsü aketba kuli kakettem bener aliba agi apu," ta ketdangserisa ashi. Maneni paisa ashiba agi, parnok asem ya Bangladesh nung taoba ita 16 tashi, tanü asüng adokba raradang amshiba oset balala amshitsü asoshi training agia liasü.

Tripur aser Bangladesh na arrtsü nung tang tashi atsü atsüa maliba tesem aika lir. 2003 küm Burma nungi telungpurtem meindokba sülen NE nung telungpurtem Bangladesh nung amenoker maparen balala inyaker.



TIR YIMYIM

YIMOBILEM (EDITORIAL)

DIMAPUR FRIDAY, MAY 26, 2017

Ochimashirtem merenshir

Alima nung ochimashi mapa inyakertem kanga lir, ibayongji item ochimashi mapa nokdangtsü asoshi yimteni telok tapu balala tenteta inyaker. Ajisüaka, ochimashirtem anema inyaktsübaji mapa temela masü, ibayongji tesem aika nung ochimashi anema inyakba mapa nung takok menguteter. Kari ochimashi inyakertemji tsübur kechiyong parnokji nisung tamajung, anungji tetsübuttsüka, karbo ochimashi inyakertem nem mesüzükdaktsür, anungji ochimashi mapa inyakertemji mepushir aser pushiyonga kecha tai meinyak ama ken o tembangtsür aser ano karibo tebushia mebushii odang amadokdaktsür. Ajisüaka, tang India nung nakmati (coal) atuba maparen nung 2014 küm supreme court-i 1993 küm nungi nakmati atutsü aoshi government-i company balala nem tesem lemsütsüba mapa ajakji meshitak aser ozüng anema inyakba mapa lir ta metetdaktsüba dak ajemdaker aibelena alirtem nem temerenshi agütsüba mapa jagi ochimashi mapatem anema karibo temulung agüja inyakdagi ta sayuogo. Ibaji linük asoshi osang tajung ka lir. Alima asünungji tamajunger alitsübasa, anungji ochimashirtema alitsübasa. Laishiba nunga Apijemtsü Shin nung "nisung tamajungertemji tamajung anogotem asoshi yanglu," ta shia angutsü. Aji oda, tamajung anogotem asoshi yangluba nisung tamajunger aser ochimashirtemjiang temeimtsüka bilemer. Ajisüaka, yimteni nisung tamajungertemji mazüokra aser oshimashirtem bushia memerenshira, lia liabo alima nung ochishir dang nungibo ochimashir teimba akümstsü aser nisung tajungertem dang nungibo tamajunger teimba akümstsü. Tanü Nagaland nung kasa tiaji atalokba angur. Ochimashi tilaka inyakdang mebushi aser memerenshi toktsü nungji, joko, office ajak nung küm shia ochimashi mapa tuluba - tuluba inyaker. Nagaland nungsa ochimashi mapa teinyakba saka Nagaland nung ochimashi mapa inyakba tai ajanga tepuodaki aiba otsübo mangashi. Ashiko, Khristan-tem dang asüba agi külemi lemsaa agir taidoker yutsür südi. Iba jagi Nagaland tekongraba - tekongraba kümer tangbo Naga nunger kechi yimsü amanger memetet aser mejangja ka kümogo. Tangarbo, 2014 küm Supreme court tashi nung ochimashiba ken o benoka jembir küen obendang agütsüba nung ajemdaker tang Coal ministry nung inyakertem rongnung mapa nungi anener alir dena tepuokdak ayutsü obendang agütsüogo. Item rongnungji Coal Ministry nung taoba secretary H.C.Gupta dena lir. Pa ya nakmati atutsü tesem alemtsüba maparen asoshi shimtetba Screening Committee nung mendenbuba liasü. Iba committee yagi supreme court-i manendaktsü tashi inyakym kecha lateta mayu ser parnok sünütsü süa inyaka ooya liasü. Iba mapang parnoki mulungba company nem nakmati atutsü tesem lemsütsüba maparen tang Gupta den Coal minister nung inyaker ketdangser ana dena aija lir. Atangji, tamalena kasa ken o ya okadak jembir saka iba mapangbo government tenzükertem dak mekongshii private company nung inyakertem kar dang aitsür anen. Ajisüaka, tang tesüsa ministry nung retire ser aliba secretary tashi tepuokdak ayutsüsa obendang agütsüba jagi linük nung ochimashi mapa anema inyakba nung takok ngua odagi ta sayur. Ministry mesüra department ka nung secretary-ji atamata masü. Pa mesüra laji department nung tekolak aser government nung shiba minister südir pa mesüra la Advisor amai lir. Yimya agi, ministry mesüra department inyakym ajakbo minister-i memeteteter, anungji kodangsa nübortem asoshi sentong (policy) kar yanglutsü südir, secretary-i dang shisalen teyur. Aji oda, kodang government nung Secretary ka ochishia lidir inyakym ajak ochishia akümer. Ashiko, ochishir Secretary-bo ochimashir minister-i meyunütsüa akok, ibayongji aiben government nung secretary-tem melenpet melena angutsü. Ajisüaka, government nung minister o Secretary na longjemer ochimashi mapa inyak nungbo alima agi matitsü aser nübortem asoshibo ibaji alima tatembang amai asütsü. Iba amaji matalokdaktsütsü atema nübortem teti ochimashi mapatem anema kanga sashia nokdaktsüla.

OLEMSABANG

Ao Lima "Land Of Revival"

I. Imdong Jamir, Sungkomen

Kibuba Yisui alima toktsür aotsü anogo anasa temulong shirangtsü o itemi yamai jembir, "Nenok temulong teraksa" Yoh 14:1. "Ni nenok ala-ashia metoktsütsü, ni nenok dangi arutsü." Yoh 14:18 asür Dr. I. Ben Wati-i yamai zulu, North Africa lima, pa Revival tulu ka nung oa aden. Iba Revival nung tongti O jembir Dr. Joe Church aser Rev. William Nagenda tenadi anogo 3 nü kibuba Yisui indang dang jembir. Tenati ashir kibuba Yisui REVIVAL "Revival ji Yisui".

Kibuba Yisui tepsettsü bushiba mapang nung, kenü Governor Pilate-i par Bungalow-i kibuba Yisui jaok. Pilate-i ashir, ni Spanish aser Roman azü nung meyokteper asoba senso ka. Kibuba Yisui par chuba kiji tonga arutsü anasa kü tetsüng marble manung yinzü agi alenneta aliba ama aküm. Pa tsüngdang ni ashi auer ka ama ni kūsasa bilem, aser atenten. Yisui ta ni pa dang ajadang kü temeli lemata atok. Küna jembidang ni ozüngsa mashir, nü o ya kanga dang taret tulu jembir, anungji tarutsü anogo tem nungbo tera ajemshir (moderate) sa jembidaktsünür, (kechiaser na asoshi tsükchir onsara) kibuba yisui-i langzü, TENEM NUNGI ALUBA AYONG DANG ANENANG, ASER YAGI LENDEN KIN NUNG ALIBA SÜNGDONG LIDONG TERA TAJUNG TERAKTET TA SHIANG, AYONG JAGI ASHITSÜ NI YIMYA OZÜNG ASER TEYANGLUR O ANGATSÜ. ANO YISUI ASHI, SHARON LENDEN NARO MAPONGDANG OCHISHISANG AZÜ TOKSHITSÜ. PILATI ASHIR NI YA ANGASHIA ASÜKSUJANG KANGA MERONG. TESANGWA TULU KA OADOKER AMA PA OADOK. Governor Pilate-i kibuba Yisui Galil District nungi ta meteter Herod chuba dangi tanüker den yok. Mapang talangka nungi Herodi pa ngunüa bilem. Herodi Yisui nungi temaitsü langka angutsü imla. Iba anogo nungsa Herod aser pilate temba aküm. Kechiaser akhidang parnok tsükchitepa liasü. Luk 23:8-12 Pilate-i kibuba Yisui ya sempet ka ama Herod nüm agütsü. Iba yagi sayur asenok Tsüngrem tenzükertem tamajunger tsüngda nung sempet lep ama amshitsü.

Asenok tamangertem züzüa Tsüngrem o-a angar, züzüadang Temeshi laishiba-a azünger, aji agi asenok tamangertem ya longya nung tsükba metsüjangji mesüker. Kibuba Yisui alima toktsür kensa oadoktsü nung jembiba o tem ya atamata o tulu jembiba o masü. 1952 Dr. C.E. Hunter-i par kibongi kensa asen Ao kin toktsür aonüp pa temelung shiranga ajepba, pa temulong shiranga jembiba, pa temulong shirangba atenba ken, anü yir oagi Yisui den, ta atenba ken, temulong shirangba ken, kibuba Yisui parnokrong nung tiyong nung arua nokdaker "nenok den tesünep liang" tebuti kechi koda ni yok aji oda nia nenok yoker, parnok dak apulokja ashi, "tanüla temeshi agizükang shir temenensa nenoki tokdir, atangji parnok dang adoktsü, shir temenensa nenoki oda yutsüdir itemji oda alitsü. Yoh 20:19-23. Asenok Tsüngremi tenzüker nem nungloktsüba tashi tuluji ibai lir ano pai ashi, Yohanibo tzü nung Baptitsü, saka anogo aika meli-i tanüla temeshi nung ni nenok Baptitsütsü. TM 1:5 50 nü Benjong anogo ya Tsüngrem sendong tulu liasü, aoksa kotak nungi mepong tesashi aonba tanüla milak tulu alimai meküpzüka yok. Iba anogo anüng kübok alima kin ajak nungi Yirusalem yimti nung sentepa liasü. Tesüngmangtsükaji, oshi ka jembitepbaji kin ajaki pei oshi nung angatetep. Ao kin meimlaba mapang ka nung 1976 May 8 honipar anüpdang Anaki Baptist Arogo nung iba Yirusalem tanüla milak alu. Yirusalem nunger amaji Anaki nungeria oshi balaka, ajepba balaka, mangdang balaka. Kasajisa August 29, 1976 Deobar aonung IEF sayutsüngir kati Molungyimsen Baptist Arogo nung sentep temer telok telongjem sarasadem ka ayongzüka sarasadem. Iba sarasadem gonda 4 tashi manen. Talisa tila tanur yimdong kazürtem pei mulongba agi am-a atenertem ajepba manen. Sarasademba manen, shin o jembiba manen, ya koda asü? Ta aiür asangur tenla kima nungi reprangertem daka tanüla kongshia parnoka jeb meso. Tsürabur kwika yabo talila ta arua repranger ajak tanüla agi kongshi, talisa tetsürtem, tantsürtem ajaki oshi balaka jembia shien meso. Nem nemer aika liasü, ASER PARNOK AJAKI RATA, ASER ATITAKA, KATI KA DANG ASHI, YA KECHI TETEZÜ? TANGARTEMI ATALA ASHI, PARNOK YI LANU AGI MESEPOGO. TM 2:12, 13. YIRUSALEM NUNGER AMAJI MOLUNGYIMSEN NUNGERIA JEMBITEBA LIASÜ.

50 nü tanüla benjong nung Yirusalem yimdak kechi atalok. Iba kasaji Anaki Arogo, aser Molungyimsen Baptist Arogo nungi tenzüka asen Ao Arogotem ajak iba kotaker milak yipru agi tesüngmangtsüka, kongshio, kibuba Yisui Yohanibo Tzü nung Baptitsü, saka ni nenok tanüla Mi nung Baptitsütsü. Iba revival tulu nung asenok ajaki pei temenen nangzüka mangyima jebogo. Oshi tasen aika jembio. Ibato tanüla Mi nung Baptiba mapang liasü. Impur Mission Centre nungi o jembir ka den nia, yangko ka nung laishiba ka enoka bener pa den counselor ka ama anidaka oa NOKLAK BAPTIST AROGO Revival nung aten. (Khiamniungan kin) mezüng aonung Tsüngremer tejembiba ka ajanga, iba Revival anogo nung nisung tain ka alima nungi ajungben pilatsü ta ni langbang nungi kuli asü. Metsütsüi tanünüp tenzüker ka ajungbena asü. Iba sülenji Revival ji kanga sashia adok. Ao o oshi agi tantsür kari-i shin o jembir. Aikati ya tim masü ta sa jembir meso. Yamaji alemli Yirusalem nunger ama, Anaki nunger, Molungyimsen nunger amaji Khiamniungan nunger a aikati kanga rataa ya kechi aser ta sungmangtepa parnoka jeb meso aser shin. Iba anogo Conseller kü kija liasü. Saka Revivalji tuluba tuluba dang ao. TANULA SOTA AYUTSÜ NISUNG SHINGA DAKA TASHI MALI. Sayu 8:8(a) "Yirusalem yimdak Revival anogo nung Peter-i nokdaker telok dang ashi, ibai alemli Yoel ainkeri shinba o ataloker. Asenok rongnung shirsa item anogo nung to tanüla mi agi rongka mangyima jebogo, tatem maka temoatsü. Asenoka Yirusalem 50 nü benjong nungji denogo. Yakob shidi NENOK JASHIA MANG YIMANG ASER JEBANG NENOK MENUBA TAJEPBA KUNANG ASER NENOK PELABA KHURET KUMANG Yak. 4:9. Alemli mapang Siria nunger Army officer Naman, pasasa Yordan tzü nung pungok, iba anogo pa temang shi sentsü kenyongi melenadok. Ibaji Revival lir, kibuba Tsüngremi Revival nung pungoktsü atema tata-mata ata satapa, kati ka reprangteba kazübaji maginer. Peteri Yirusalem nunger dang ashi, tesüngmang, tatem anogo nung Tsüngremi meimchir ajak nüm kü nüla meküploktsütsü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepishir

Nisung tsungdang shidak mesükba lenmang

~L.Kika Pongener, Aoyimkü, Dimapur

A.Shin-16:25."Nisung tsungdang shidak mesükba lenmang ka lir, saka iba tatembangji tasüba lenmang." Asenoki tejen Lai nung Yihusua tapu 6 & 7 ji jungjunga zungdangra Israel nungeri parnok Ijip lima nungi adokdang Yeriko yimti tulu anung tonga attsü agi longbanga atsübanga aliba yimti ka amakdang, Israel purtemi tenetben dang jangzü apo-a meketa along nung "Yeriko" yimti tulu chirepdaktsü aser takok angu. Ajisuaka Akan-i bendanga agutsüba osettem süpoku, taribi aser hon auya-a aben, aser ibayongji ano iba Yeriko yimti dang nungi kanga agi tilaba yimti ka "Ai " yimti matsungdang tamakok angu. Aser kechi tai ajanga iba tamakok ya angu ta bushidanga ao, aser Akan-i bendanga agutsüba oset auya-a abenbayong, iba meji Israel kin tamakok angu ta putet. Anungji Yihusua-i Tsüngremi melaba ama Akan aser pa dak jakzükba jala-jabasotem, aser pa akaba rongsen ajunga, oda kiset shiruru dena Akhor lenden nung anir oa lung agi onseta sūdaksü. Akan-i Yeriko yimti nungi Supoku, Taribi aser Hon abenbaji tim mapa amai bilema inyak, kechiaser kodang parnok iba yimti madak takok angu, item osetji joko kibur maliba oset ka amai küma-adok, anungji item osettem Akan-i agibaji asenok nisünger tsütsü nungibo kecha aibelen mali ama bilemer inyak. Ajisuaka pai aji inyakba ajanga pa aser pa dak jakzükba chirnur aser takaba rongsen, oda kiset shiruru dena lung agi onseter kulen-ang ano mi agi rongdoktsü, kechiyong aji Tsüngrem anema inyakba temenen mapa tulu ka liasü. Mosa Sinai tenemi ozung lungpak abeni tur menua malu, idangji Israelpurtemi Aron dang Ijip lima nung kulemba ama süngyanglu yanglur külemtsü meshi, aser nübur lokti tulu agi anungba maremtet nungji, Aron-i hon kuri, taribi aser yongminyin bendener Nashi chanu ka mulur külemdaktsü. Aser iba atema Yihova Tsüngremi Aron dang aser Israel purtem dang kanga mepela, aser kodang Mosa Sinai tenem nungi meyipa alu, nübur shirnoki süngyanglu yanglutsü asoshi Aron tang ajungshi parnok ajak samatsütsü Tsüngremi ozung agutsü, ajisuaka Mosai Tsüngrem tang nai iba aibelen taiyong ozü nübur samatsütsü melena Kodak nung taküm kakat nung kü tenung zülua alibaji-ang aidokang ta mepishi, anungji Tsüngremi Mosai ashiba anga-a, iba melen wara tesashi ka-ang yok. Israel nübur teimbai ka küma longjemer inyakba mapa ka asünungji kecha aibelen masü amai bilemer inyakogo südi, ajisuaka aji Tsüngrem anema aibelenba mapa tulu ka liasü (Anitet tapu 32 nung zügra tejangja angutsü). Tsüngremi Saul chuba dang Amalek nunger amaktsü aser parnok akaba rongsen ajak samatsütsü mela, aser Saul chubai tashi angaa Amalek nunger amak aser parnok madak takok angu. Ajisuaka Saul-i tejekketba nashi aser san teyira tajungtibatem anunga ayu, aser tanungba tamajung teshimzük ajak meshimeshia samatsü. Aser Samuel ainkari Saul chuba tang asungdang, item nashi aser san asatepba ola ya kechi? Aser Saul-i langzü Kibuba Tsüngrem nem tarungba tenla agutsütsü asoshi San teyira aser tejekketba nashi tajungtibatem Amalek nungi bener aru. Tsüngrem nem tenla agutsütsü nungdem nung bener aru asünung shidak amai bilema inyakogo südi, ajisuaka iba meji Tsüngremi Saul chuba sentok aser pa Israel madak chuba kümdaktsüba atema Tsüngrem kanga jashi (1 Samuel-15:1-23). Ahab chubai Nabot-er tsükmenatsü lu nükshia ibaji agitsü meji pai Nabot lung agi onseta sūdaksü aser tsükmenatsü lu-ji tashiyim agi rakzüka agi. Anungji iba atema Tsüngremi Ahab dang kanga jashi aser Elija ainkar ajanga yamai ashi, Nabot zü koba azü-i menak iba azü jagi Ahab zü menaktsü aser Ahab dak jakzükba tebur chanu ajak leptoktsü, oda nu menden nung tangloka aliba dena ajak leptoktsü. Chuba kati temzung-ozung tesashi amshia pa tashi aser akünnung inyaker asünungji nisung tsungdangbo shidak amai bilema inyak aser takok angu, ajisuaka aji Tsüngrem anema aibelenba temenen tulu liasü (1 Chuba-21:1-14).

(Maneni asung adok nung...)

Ghonda 40 shia India nung Khristantem anema inyaker

May 25, 2017: India nung Khristantem amakba kanga bulua atalokdar, ta osang ka ajanga metetdaksü.

All India Christian Council osang ka ajanga ashiba agi, ghonda 40 shia India nung Khristantem anema inyaker, kechiyong sorkar tashi nung aliba Hindu nationalist party-i India ya "Hindu linük" ka kümdaktsütsü meranger.

2016 küm Khristantem anema inyakba shilem 20 shi agi timba akum, aser tashiyim amshia inyakba shilem 40 shi agi timba akum.

"Khristantem anema inyakba kanga bulua ataloker aser tamajungba akumer. State kar nung ang item tatalokbatem

liasü. Ajisuaka tangbo state 23 tashi nung item ama tatalokba ataloker," ta kasa osang nung shia lir.

Khristantem amakba rongnung- tashiyim amshia azükba, Tenla ki rongdoktsüba, Tenla ki raksatsüba, Laishiba rongdoktsüba, tepsettsü amokmerenba aser Khristantem dang tamangba yimsü toktsür Hindu yimsü dangi meyiptsü densema lir.

Tan ita tetenzüklen right wing telok, Hindu Yuva Vahini-i police tashi amshia Uttar Pradesh nung Khristantem sarasademba sentong ka anendakja liasü. Hindu Yuva Vahini-i ashiba agi, nisung 150 dak tema adenshia

sarasadembaji nisungtem Khristan yimsü dangi meyipdaksütsü nükjidong nung lir, ta aitsür.

Taküm February ita nunga India nunga Evangelist kati yimjak nung tasen Lai alemer, ta aija Hindu nationalist temi amokmerena liasü.

Hindu telok jagisa pa dang "Na rongseta sūdaksütsü. Yisu-i na mi nungi kümzüksü asü?" ta asünganga liasü.

2014 küm Lok Sabha election nung Hindu national party- Bharatiya Janata Party-i takok anguba sülen Khristantem anema inyakba mapatem tali bulua kümogo. BJP-i Hindutva tangatetba nung inyaker.

ANOGO ABEN TSÜNGREM DEN

TENÜK TELEN SHIA TEKÜMZÜKSANG

"Saka asen temang tenük telentem koba tali akhüm taketba lir; item jagi kecha menügdaker ama lir. 1 Korint 12:24

T. Pauli Korint nung aliba tamangertem den pai mezung shidi nung lemsatepba angur. Khrista temang nung tamanger shiaji tongtibang shilem kaka lir. Nisung temang rangben ajungtsü asoshi tenük telen shia koma mapa inyaker iba den medemdanga, Pauli tanela sempet balala ishika shia angur (vs 8-10). Korint nung aliba tamangertemji, sobaliba balala, sempet balala, aser yimya yimko balala süaka, parnokji tanela kasai sünga aser kasa Khrista temang meyong lir ta shia angur.

Nisung temang nung tenük telen tila aser tashimait saka tongtibang ta Pauli shisembaji, yamaji tamanger shia pei mapa balala inyaksü nungdak ta shinüba lir. Tenük telenji ka dang nungi ka tenügdakba masü.

Marvin Williams yamai ashir, "Tsüngremer lokti yanglutsü asoshi, Yisui asenok shia nem teinyaktsü kaka nunglokja lir ta bilemtetang" Atangji, asen kibong, loktitem aser Arogotem tamang aser tanela ka nung Tsüngrem tenung nung nokdaktetsübaji kati ka yaritepba lira Tsüngremji asenoki teti peladaktsür aser ibaji asenok temoatsü.

Sarasadem : Tsüngrem onok tashi mait aika liaka koba nai onok nem kechi inyaksü nungloktsü ibaji shitak inyaktetsü tashi agüjangma.

Amen

Billy Graham Chaplain temi teyari mapa atema Manchester semdang



May 24, 2017 nü Manchester (England) nung aliba St Anns Square nung nüburtemi tawa kiralongrartemi amakba lendong nung asürtem nem akhüm agüja nokdakba noksa nung angur.

May 25, 2017: Hombor kibongtem ajurua teyari aonung kiralongrartemi agütsüba den külemi parnok Manchester, UK amakba nung melung süneptsüogo.

Rapid Response Team lenir, agütsütsü atema Manchester-i Nigel Fawcett-Jones-i, "Nisung aotsü asoshi Billy Graham shia dang nungi telangzüba Evangelistic Association nungi balala liasü," ta metetdaksü. chaplain tem- Rapid Response Ministry team-isa local Team nem lemezükja liasü. Arogotem den senteper nüburtem nem teyari agütsüdar.

Hombor aonung Ariana "Onoki teti agia local Arogo Grande kenten sentong nung lenirtem den longjemer inyaker. bomb amshia amakba lendong Ijabi parnok aliba tesem, aser nug nisung 22 asü asr 59 tashi item tesemji parnokji tajungba yirua liasü. meteta lir," ta paisa ashi.

Iba tatalokba sülen Fawcett-Jones-isa nüburtem mangyimer nüburtem dang Manchester lenmang balala agi yaridar. nüburtem, talisa lendong nung takoksa angur kibongtem

Ajioda Billy Graham sarasadem ajanga nungittsü chaplain tema Manchester-i oa mangyimer aser yirua alir ajungshiogo.

OLONG PAITEP # 4432

1		2					3		4	
						5				
6			7		8					
								9		
	10			11						
12										13
			14						15	
16										
					17					

TIPIEN

- 1. Taret - (6)
- 5. Sentilung / Senti oset - (5)
- 6. S_ _ _ mang - (3)
- 7. Ninang tula ka - (4)
- 9. Alima toktsür ao - (3)
- 10. Nüngdak mali - (9)
- 12. Mejangba yimdangi aru - (3)
- 14. Ya sürbo / Iba sülen - (4)
- 15. Ta _ _ _ r - (3)
- 16. Magima - (5)
- 17. Tasü maiti tsübu - (6)

LANGTSÜNGLEN

- 1. Rongsen akar - (5)
- 2. Ajungben - (7)
- 3. Tapok - (4)
- 4. Kou mali - (6)
- 8. Shitak masü - (3)
- 9. Tebur ano kibong maküm - (7)
- 10. Jenjang temela - (6)
- 11. Tanur alimai aru - (3)
- 13. Iba küm - (5)
- 14. _ _ _ _ o Etiben - (4)

OLONG PAITEP # 4431 TELANGZÜBA

TIPIEN :

- 2. Asangwa, 4. Tasa, 6. Temupu, 7. Sayu, 8. Sang, 9. Ilen, 10. Juli, 12. Teyira, 13. Aisü, 14. Poksüng.

LANGTSÜNGLEN :

- 1. Kanga, 3. Anungji, 5. Angu, 6. Techira, 7. Shiotep, 10. Jala, 13. Lemsä.

Agüja aliba OLongtem bushiang

D P D
X W Y Q O U U L W
Q M B S J S O O F X R W T
Y X D X E S Y Q N H F U N A Z S W
W X E V H W P Y X D S F P L I Z Y U P
P I B F T E Y F X E K A E X A A H M E D C
N E R O E P C T K C L R T P B R U Y O G N
V K K L P V N I V T U W N N B O L
A U C R V R T T G T F D E D K I G
M D D R E H S A W H S I D U S M V I L S P R X O F
T L C D E H F C X K Z E H O E L B A T T E S Y W D
O G L R K N I S N A E L C E T Q F Q C D D X D H Q
F I V E S N K O B E R H N Z K A D L U Q L Y F D P U C
T H B A U U T M J U T X W C A U P L O R G A N I Z E J
T Y B N T I U D I O L T X Y T N W A S H D I S H E S N
Q L P C D M F E E D P E T S W J H S Q A O C C
D T E X U I V S G R O C E R I E S H M D K
U Z T W X V F S W Y F Z J R K L D U E X Q
D C A A E Q T R W M
X A Q V L C E I R G O E
G J V G R F X Q A Q X E T J S R G R J Y R
E X W A T E R P L A N T S M K P E Y V Q K
N S R E T N U O C E P I W H J G N R D
Z J S W O D N I W H S A W I E Y P
N Y A W A F F U T S T U P
D P A P H R F M X
S L W

CLEANPETCAGE	ORGANIZE	FOLDCLOTHES	WASHDISHES
CLEANSING	PUTSTUFFAWAY	GROCERIES	WASHWINDOWS
DISHWASHER	SETTABLE	HOMEWORK	WATERPLANTS
DUST	SWEEP	LAUNDRY	WIPECOUNTERS
FEEDPETS	TAKEOUTTRASH	MARKING	WRAPFOOD

TANÜBO NAI LANGZÜANG

Q. National Commission for Minorities (NCM) mendenbuba atema shiba shim?

- [A] George Kurian [B] Gayarul Hasan
- [C] Sulekha Kumbhare [D] Athornan Anjuman

(Taruba adok nung onoki langzüsü)

YASHI ADOK TELANGZÜBA :Rohan Chakravarty



Tanur asoba anogo nung salem osang den noksa angati adokdeksünura - Tenüing, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jela e-mail : tirymyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüing :
- 2. Tasoba anogo:
- 3. Küm : 4. Class :
- 5. School :
- 6. Talidak :
- 7. Salem osang :

NAIA YA METETER MA

Nepal Ato kilonser tassenbaji, Sher Bahadur Deuba asütsü. Deuba ya Nepali Congress lenir ka lir. Tamalen tezüngzüktep ka agia aliba nung ajemdaker Pushpa Kamal Dahal "Prachanda"-i Ato kilonser menden nungi anena liasü. 2016 küm August ita nung Deuba-i pusema Prachanda



Ato kilonser shimba mapang nung tezüngzüktep ka agiba nung ajemdaker pai iba menden nungi anenogo. Tezüngzüktep nungji, local election agiba mapang tashi Prachanda Ato kilonser inyaksü, aser Provincial den Central levels election bo Bahadur Ato kilonser inyakba kübok agitsü ta züngzüktepa lir.

SUDOKU # 3544

4	6	7		2	3			9
				7	8			
		3				7	4	
					3			
7	8	4	3					
1	3				7	9		
7	2			8	9		5	
			1	4	2			
8	5	2		6		3		

TELANGZÜBA # 3543

3	6	8	4	9	2	5	1	7
5	9	7	1	8	3	6	2	4
4	2	1	6	5	7	3	8	9
1	7	5	2	6	8	4	9	3
9	3	2	7	4	5	1	6	8
8	4	6	3	1	9	2	7	5
6	8	9	5	3	1	7	4	2
2	5	4	8	7	6	9	3	1
7	1	3	9	2	4	8	5	6

OJANG LUTEP # 4038

- ESNA :
- NGESOTN :
- AGDN :
- BUGNION :
- SEAN :
- MTEAA :
- GMERÜNTERS :
- NSEGONT :
- AGJBUANT :
- RIL :

OJANG LUTEP TELANGZÜBA # 4037

TEMANG ANEMA ALIDANG MAPA TAJUNG INYAKTSÜ MERANGTSÜLA MESÜRA TARUTSÜ AYATAI

Anü ita petinu ajanga alima nung tsüngsang mopung melenshidaktsüba ama nisunger tia-a melenshidaktsür ta anü ita petinu tetzürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdangang (Horoscope):



Aries
21/3-19/4

malitsü, saka nai tangar den sensaksem akatsü merangang. Iba ajanga nü mapa nung tajangzük angutsü.




Taurus
20/4-20/5

Tanü nai tangar den o aika mejembinütsü. Saka nai akok tashi o jembitsü merangtsüla, mesüra alimai na doktsür aor amai nai bilemstsü.



Gemini
21/5-20/6

Tanü nai o jembiba manentettsü aser mapa nung temolung magütsütettsü südi. Anungji jembishinü aliba mapa kar nai bushia inyak tajungba asütsü.



Cancer
21/6-22/7

Kinunger aser medemertem den nai mapang tatsüka mejembi aliba bushia jemiabang. Talang nung aliba kinunger den tesendaktep tajung ayutsü anogo tajung lir.



Leo
23/7-22/8

Nai tanü nü temeli azüoka ayutsü merangang. Nü tejangrabatem inyakba ajanga nai medemer tasen aika yanglutettsü südi.



Virgo
23/8-22/9

Tanü nai sadoksayima inyakettsü mapa kar bushia inyang. Aser nungdakba o tem jembiba ajanga nü mapa nung teyari angütsütsü südi.



Libra
23/9-22/10

Tanü nisung ajaki o jembinüba ajanga mangatettep kar adokba nai angutsü südi. Nai item mangatettep nung shilem magitsü merangang.



Scorpio
23/10-21/11

Tanü nisung aikati o jembiba nung na temolung yirutsü, anungji nai jungjunga bilemdanger jemiabang aser na kanga kümdanga liang.



Sagittarius
22/11-21/12

Tanü medemertemi jembiba o aika nai anganütsü aser parnok den külemi mapang indoktsü jangratsü. Nai osang tasen kar angazüksü.



Capricorn
22/12-19/1

Tanü nai lokti nung shilem agitsü tejangraba mangutsü. Nü mapang junga amshitsü merangang aser mapa temer anisungzüka liang.



Aquarius
20/1-18/2

Nü tekolok nung bilemba ajak jemiabang saka yimya tajung amshiang. Kechiyong tanü nür medemer aser na meketa alir rongnung nai tasü taitba jembitettsü.



Pisces
19/2-20/3

Tanü nü mapa nung temolung bendanga agütsür inyaktsü tasak asütsü. Anungji medemer nungi shisa agiang aser temolung agüja inyaktsü merangang.

Suriya, Sathyaraj asertanga Tamil actor 6 anema Non-bailable Warrant agütsü



May 24, 2017 (Agencies): Ooty nung magistrate court kati Mongolbarnü Tamil film actor 8 anema non-bailable warrant ka agütsüogo. Item actortem temji; Sathyaraj, Suriya, R Sarathkumar, Arun Vijay, Vivekh, Sri Priya, Sarath Kumar aser Cheran nunger lir. Taoba mapang freelance journalist kati parnok anema okadak ken o ka benokba atema obendang agütsütsü asoshi okadaki jaokba sülen parnok maruba ajanga court-i iba tetuyuba agütsü, ta osang ka ajanga metetdaksü.

actress Bhuvaneshwari teküp ayokba dak sendakba ken o nung Tamil Nadu police-i apuba den sendaktepa lir. Lai iba mapang nung iba ken o nung sendaktepa aliba actor tem kar tenüng tetuteta ashi. Lai kuli agütsüba dak anemoker otsü aika temai adok aser iba nung Tamil film industry nung nungtugu nisung kar dena densema liasü.

ayonga aka. aji saka ken o benoksang freelance journalist, M Rozario-i ashiba agi, iba ocet adoktsüba osang kakat kicha aitsütsü melena actor temi journalists ajak aitsü.

Iba dak ajemdaker 2011 küm court ajanga parnok 8 jaok, saka actor temi parnok court-i marutsü asoshi temepishiba ka agütsü koba court-i magizüki liasü.

Iba sülen South India Cine Actors' Association (Nadigar Sangam) puri, actor tenüng menüksüa osang kakat ka nung ocet ka adoktsüba aitsütsü asoshi senden ka

Maneni 2017 May 17 nü parnok court-i arutsü asoshi jaok saka parnok shinga maru anungji magistrate-i parnok anema non-bailable warrant agütsü.

Jagga Jasoos film July 14 nü sayatsü

Mumbai, May 25 (agencies): Ranbir Kapoor aser Katrina Kaif nati tongti shilem agiba film Jasoos July 14 nü sayatsü asoshi renema lir.



Iba film ya Anurag Basu-i direct asü aser April 7 nü theater tem nung sayatsüba liasü.

Disney and Picture shuru Production-i produce asüba iba movie trailer bo yaküm December ita sayaa liasü.

Iba film otsü ya Basu-i zülü aser film nung ano Saurabh Shukla, Adah Sharma aser Sayani Gupta nungeri tongtibang shilem agir.

Iba fil ya Basu aser Katrina na atema külemi shilem agiba film mezüngbuba asütsü. Basu aser Ranbir nabo taoba mapang Barfi film nung külemi inyakatokogo. Iba film nung music ajak Music director Pritam-i mejem.

TAN HOPTA ATEMA - KOMA SÜLA ?

Q Nagaland nung senzüba taxi aser auto rickshaw ajak ya Naga nungertemi dang anitsüla ta ozüng küma latet nunga koma süla?

Olong 20 shi nung May 26, 2017 tashi nung iba telangzüba ya onok dangi

e-mail - tiryimiyim@gmail.com mesüra SMS - 9856121232 / 9436072422 mesüra Tir Yimiyim Facebook account ajanga yokang. Telangzübatemji taruba Hokolbar nü adoktsütsü.



May 24, 2017 nü 70th annual Cannes Film Festival mapang Palais des Festivals nung (abelen nungi) actors Elle Fanning, Nicole Kidman, Colin Farrell aser Kirsten Dunst nungertemi 'The Beguiled' photocall nung shilem agiba noksa nung angur.

Dubai nung robot police officer-i mapa inyak



Dubai, May 25 (Agencies): Dubai Police ajanga mezüngbuba robot police officer ka sayuogo aser iba robot ajanga yimti nung shishilembadak tesem tulu aser raliwalir-i sabuba tesemtem anüksü.

Nüburtemi iba police tanishir nem mapa tamajung inyakba osang agütsütsü, senchi agütsütsü aser pa teku nung touchscreen aliba nung kongshiba ajanga osang balala angtsü.

Iba robot ajanga bendenba data ya transport aser traffic ketdangser den lemsateptsü, ta osang ajanga ashi.

Sorkar nukjitong ya 2030 tashinung robot police ya shilem 25 jungdaksütsü saka parnoki nisung bo memelentsü, ta ashir.

"Onoki iba oset den police officer tem memelenteptsü. Saka Dubai nung nütsüng renlokba yong police officer ya tesem shidak nung yutsütsü aser nüburtem kümzüka ayuba nung temolung agütsütsü," ta Dubai Police nung Director General of smart service, Brig Khalid Al Razooqi-i osangbener dang ashi.

"Nisung aikati police station semdang, saka iba oset aliba ajanga nüburtem dangi amang sangwa melie otettsü," ta police

lenir-isa shisem.

Iba robot police officer ya Pal Robotics nungi Reem model ya yanglushi aser Gulf Information & Security Expo & Conference nung Deobarnü sayu.

Iba robot ajanga Arabic aser English ajanga dang 'communicate' asür aser tarütsü nung Russian, Chinese, French aser Spanish oshitem inoktsütsü sentong lir.

Tanabuba Reem robot ya sorkari sen teyari agütsüba nung ajemdaker taruba küm nungi mapa inyak tenzüksü, ta Dubai nung aliba sorkar osang ajanga ashi.

Rajinikanth-i pa sapurtem dang kümdangshitsü metetdaksü

Chennai, May 25 (Agencies): Tamil superstar Rajinikanth-i tanü pa sapurtem dang tim masüba yimya yimpong mebenschitsü asoshi metetdaksü aser fans club indang code alema inyakertem iba telok nungi togudaksütsü, ta ashi.

Actor-i tatalokba kecha balaka shia iba osang magütsü saka pa yimten yimsüsüba ren nung shilem agitsüba olen ka metetdaksüba sülen pa sapurtemi pa tenüng sanga Chennai tesem balala nung poster tem maloktsüba mapang ka nung pai iba osang agütsü.

Anogo isheka tejakdang pa yimten yimsüsüba ren nung atentsüba osang anema nisung kari pa noksa rongtoktsüba atema pa sapurtemia anogo ana tejakdang noksa ka rongtoktsütsü meranga liasü. Pa sapurtem dang pai shidi ka züluba, koba media balala nung

adokja liasü, iba nung pai ashiba agi, All India Rajinikanth Fans Welfare Club nung ketdangser V M Sudhakar dang yimya yimpong tim masaüba benschiba züngsemtem iba telok nungi togudaksütsü asoshi tetuyuba agütsüogo.

"Ni club nung züngsemtem yimya yimpong teim müsüi benschiba puteterem club nungi togudaksütsü asoshi V M Sudhakar nem tetuyuba agütsüogo," ta pai ashi.

Taoba hopta pa sapurtem den ajurutepa jembidang pai ashiba agi, DMK nungi M K Stalin aser PMK nungi Anbumani Ramadoss nung amala lenir tetangshi liaka sorkar inyakim kanga mejungi kümogo.

Tamil nung telok kati pa Tamil nung masü saka Kannada nung ta aitsüba nung telangzüba agüja pai pa chichiba Tamil nung ta shia liasü.

Xiaomi Mi Max 2 sayaogo

May 25, 2017 (Agencies): Xiaomi company ajanga tanü battery tashi 5300mAh keta aliba Mi Max 2 sayaogo. Iba phone ya screen tulu aliba smartphone category nung parnok phone tasentiba lir. Mi Max 2 China nung June 1 nungi sen RMB 1699 tükalen agi angutsü.

Yaküm sayaba screen tulu aketba smartphone category nung Mi Max aikati kang sabua talinür aika liasü. Tang tashi nung iba phone million 3 dak tema yokogo.

Iba phone nung 6.44-inch screen keta lir aser iba ya movie aser TV show balala reprangba jenjang tali tajungba küma ajungketsü nükjidong nung yanglu. Iba den külemi Mi Max 2 stereo speakers aser landscape orientation keta aliba ajanga iba phone ya mobile theatre ka mesüka kümdaksür.

Iba phone feature tem rongnung "One-handed mode" densema lir, iba ajanga phone amshirtemi display tilaba kümer teka ka agi dang amshitettsü. Xiaomi company ajanga ashiba agi MIUI ajanga yakta "Split screen" sayatsü, koba ajanga 6.44-inch Full-HD display nung ya application ana mapang ka nung amshitettsü.

Mi Max 2 nung battery tashi 5300mAh lir aser iba ajanga ghonda 18 vedio reprangtettsü, ghonda 12 GPS navigation mesera ghonda 57 jembitettsü, ta company ajanga metetdaksü. Mi Max 2 yagi USB Type-C port ajanga tanga phone-a charge sütettsü.

Maneni Mi Max 2 nung



tesülen camera 12-megapixel aser tejaklen camera 85 degrees wide-angle view densema 5 megapixel keta lir.

Mi Max 2 features tem rongnung ano 14nm FinFET technology den Qualcomm Snapdragon 625 chipset aser Xiaomi indang in-house MIUI skin densema Android Nougat keta lir.

Xiaomi company ajanga ashiba agi, iba phone nung Qualcomm Quick Charge 3.0 keta aliba ajanga ghonda ka tsünga nung battery 68 percent tashi charge sütettsü.

Tanga features tem rongnung tesülen fingerprint scanner, IR blaster ka aser microSD amshia storage 128GB tashi atsülangtettsü.

Mi Max 2 nung unibody metal design aser Sony IMX386 1.25-micron large-pixel camera sensor ka dena keta lir.

Mi Max 2 tapu ana nung angutsü; 64GB storage densema 4GB RAM variant aser 128G variant. Iba phone hon sentsü nung angutsü.

Sen crore 2.3 jenjang Vertu Signatura Cobra phone saya

May 25, 2017 (Agencies): Phone yangluba company, Vertu ajanga sen crore 2.3 jenjang Vertu Signatura Cobra phone sayaogo.

Ibai feature phone ka lir aser online nung China nung indang e-commerce JD.com nung angutsü.

Iba Vertu Signatura Cobra phone nung per noksa ka keta lir.

Osang ajanga ashiba agi

Vertu indang Signatura Cobra feature phone ya ti dang yanglua li.

Item phone ti rongnung China nunga ka dang ayoktsü, ta osang ajanga ashir.

Vertu Signatura Cobra feature phone nung sen asakba ya kechiba süra, iba phone nung per yanglua aliba nung 'rubies' 439 lir aser tejaklen per tenük ana ya 'emerald stone' lir. Iba phone nung tanga sentilong-a

inoka lir, ta osang ajanga ashir.

Vertu Signatura Cobra indang display ya 2-inch QVGA aser 240 x 320 TFT LCD resolution lir. Iba display nung sapphire crystal inoka lir. Iba phone nung 2GB RAM aser 16GB internal storage lir.

Iba Vertu phone nung aliba battery ya agizüktettsü akoker aser khen full charge asüba ajanga ghonda pongu-ser tesadang jembitsü akoker.

Mercedes-Benz 300SL Roadster sen million ka dak tali agi ayok



London, May 25 (Agencies): Belgium nung aliba Spa-Francorchamps motor racing circuit nung Spa-Classic den külemi akaba Bonham auction nung 1958 Mercedes-Benz 300SL Roadster gari ya sen €1,127,000 agi ayok.

Iba gari indang jenjang ya €600,000 nungi €800,000 agi ayoktsü südi ta bilem saka iba model yagi million € dak tali agi yoktetogo.

Swiss chateau ka nungi tawa gari 12 ngutetba nung 1958 Mercedes-Benz 300SL

Roadster gari ya densema liasü. Iba tesem nungi ngutetba gari ajaunga ya sen million euro ana dak tali agi yoktet. Iba tesem nung bendena aliba gari rongnung Mercedes-Benz 300SL Roadster den külemi 1969 Maserati Ghibli SS 4.9-Litre Coupé (sen €174,800 agi ayok), 1980 Aston Martin V8 Volante Convertible (sen €172,500 agi ayok) aser 1933 Rolls-Royce 40/50hp Phantom II Roadster (sen €111,550 agi ayok) garitem liasü.

Iba auction nung gari

yokzüker rongnung Porsche indang 1958 356A Super Speedster gari sen €22,000 agi ayok, 1989 911 3.2-Litre Speedster gari sen €280,000 aser 1993 911 Turbo 3.6-Litre Type 964 Coupé sen €195,500 agi ayok.

Kasa auction nung Ferrari indang 2006 575 Superamerica F1 gari sen €293,250 aser 1996 F355 Challenge Coupé sen €158,500 agi ayok.

Taruba Bonhams car auction ya Goodwood Festival of Speed, UK nung 2017, June 30 nung alitsü.



Kolkata, May 25, 2017: Brihostibarnü Kolkata nung BJP züngsemtemi 'Lal Bazar Abhiyan' longkak aيتدang police-i ajok agi züka parnok mindokba noksa nung angur.

Modi sorkar yimsüsüba kübok sensakertem timtemer: Yechury

New Delhi/Agartala, May 25 (Agencies): Narendra Modi'er sorkari India linük ana yangerdar- ka nung takartem sentsüwangshir aser ka nung sensakertem timatemer, ta CPI-M General Secretary, Sitaram Yechury-i metetdaksü.

Communist Party of India-Marxist (CPI-M) anogo ananü senden tembangba sülen osangbenertem den jembidang Yechury-i, "Modi sorkari 'Tajung Anogotem' yimyim nung India ana yangerdar- ka nung takartem sentsüwangshir aser ka nung sensakertem timatemer," ta ashi.

"Modi'er sorkar office küm asem ajungba atema benjungba mapang ka nung sorkar statistics ajanga ashiba agi, sentsüh aser sorkari aluyimertem anema mapatong balala atongba ajanga 2014 küm nungi tenzüka küm shia aluyimer 12,000 soseta süogo," ta Left party lenirisa ashi.

"Chiyungtsü agütsürtem (aluyimertem) timtem nung lira

kodaser linük aintsü. Sorkari minimum support price, import duty aser input costs majungkettsüba ajanga aluyimertem anema mapatongtem benok," ta paisa metetdaksü.

CPI-M politburo züngsem aser taoba mapang general secretary Prakash Karat-a anogo ananü senden nung dena liasü.

Yechury-isa, "'Tajung Anogotem' dak sendakba nung Bharatiya Janata Party (BJP)-i küm shia mapa tasen crore 2 adokdaksütsü ta nangzük. Ajisüaka mapa tasen kar dang adok. Ano külen nisung meyrjang aika mapa makai kümdar," ta ashi.

Pai ashiba agi, linük nung tongtibang Information Technology company temi mapa 56,000 tashi makai kümdaksüogo.

"International agency ka indang survey ajanga ashiba agi, ano taruba kümtem nung information technology sector

nung nisung lakh 40 nungi shilem 40-50 shibo mapa makai akümtsü," ta paisa ashi.

"Parnoki (BJP) May 26 nü (küm 3 ajungnü) koba benjung mungner ? Iba benjungmungji tamakok anguba aser ashioktsüba benjung ka asütsü. Modi-i linük ya tesüleni anir odor," ta pai aitsü.

"Industry tsütsülen Ato kilonser, Narendra Modi-i 'Make in India', 'Startup India', 'Digital India' aser aika sangdonga liasü. Ajisüaka tesüiba küm asem nung tenüng tajung agitsüsa investment jenjang nguteta mali," ta CPI-M lenirisa shisem.

Left leniri, "Yimsüngtem nung mapa scheme (MGNREGA) ajema kümogo, aser tesüiba küm asem shia nisung 20,000-i taa mangu," ta ashi.

Paisa, "PDS (Public Distribution System) ya tangbo mali ama kümogo. Kerosene totzü aser shini na PDS supplies nungi agienogo," ta ashi.

Jammu & Kashmir nung army-i telemtetba agitsü akok: Jaitley

New Delhi, May 25 (Agencies): Army ketdangsertemi rara mesüka aliba tesemtem nung telemtetba agitsü akok, ta Union Defence Minister, Arun Jaitley-i ashi.

Jammu & Kashmir tensa dak sendakba nung Jaitley-i, "Mitkar ketdangsertemi mitkar

atema lenmang bushir. Rara mesüka aliba tesemtem nung tensa tamajung ajurudang koma inyaktüsüla, iba telemtetbaji agitsü atema asen sepai ketdangsertem nem temelaba agütsütsüla," ta ashi.

"Iba ama tensa ka nung koma inyaktüsü, iba atemaji parnoki

Parliament züngsemtem den o lemteptsü menüngdak," ta paisa ashi.

Yakünü Indian Army temi Line of Control nung Pakistan nung positions maaka liasü, aser iba dak sendakba nung tanü Union Minister-i iba o ya jembio.



New Delhi, May 25, 2017: Brihostibarnü New Delhi nung Ato kilonser, Narendra Modi-i Tata Memorial Centre indang Platinum Jubilee Milestone kakat sayatsüba noksa nung angur. Kasa noksa nungsa Ratan Tata den tongtibang nisungtema kar angur.

CBI court-i LK Advani, Uma Bharti aser Manohar Joshi nung May 30 nü jaoker

Lucknow, May 25 (Agencies): 1992 küm Babri Masjid raksatsüba ken o angadanga court, Lucknow CBI court-i iba ken o nung Brihostibarnü BJP lenirtem- L.K. Advani, Uma Bharti aser Murli Manohar Joshi nung May 30, 2017 nü court-i arutsü jaokogo.

Taoba ita Supreme Court-i

Babri Masjid raksatsüba ken o nung BJP lenirtem- Advani, Murli Manohar Joshi, Rajasthan Angh Kalyan Singh, Union Minister Uma Bharti nung den tangartem anema ken o agüja aliba asentenshia liasü.

CBI-i Supreme Court dang parnok anema ken o akatsü mepishiba sülen SC-i iba telemtetba agia liasü.

Mt. Everest nungi India nung tasü mang ana bener aluogo

Kathmandu/New Delhi, May 25 (Agencies): Yaküm India nung ana Mount Everest tenemi atudang asüba tasü mang ana tsü mang majungba agi bener maluteti liasü, saka tanü tasü mangji bener aluogo, ta Brihostibarnü ketdangsertem osang ka ajanga metetdaksü.

Nepal nung tenemi atur telok kati Goutam Ghosh aser Paresh Nath na tasü mangji tenem nungi bener alu.

"Tasü mang anaprongji tang camp two nung lir, aser yang nungjagi tayimtsü ajanga bener aotsü. Tasü mang anaji Kathmandu (Nepal yimtiba)-i bener arutsü atema onoki maparen inyakdar," ta ketdangser ka tenüng agi, Sayeed Ahmeed Baba-i

metetdaksü.

Nath tasü mangji yaküm angu, saka tsü mang majungba ajanga bener malutet. Ano Ghosh tasü mangjibo taküm ang ngua liasü.

Tasü mang anaprongji metre 8,000 tema nung angu. Iba tesem nungjagi "death zone" tenzüker, kechiyong iba tesem nungagi tenem kolaki atutsüji kanga asakba den külemi oxygen ajema lir.

Tan mongpu nungsa Everest tenem nung nisung trok sama, aser Mongolbarnüa tasü mang pezü nguogo. Tan mongpu nung nisung 382-i takok ngua tenem kolak tongtetogo, iba den külemi Tibet nungia nisung 120-i takok ngua tenem kolak tongtetogo.

Maharashtra CM amenba helicopter tsükok



May 25, 2017 nü Latur nung Maharashtra chief minister, Devendra Fadnavis amenba, Sikorsky VT-CMM helicopter tsükoka aliba noksa nung angur.

Latur (Maharashtra), May 25 (Agencies): Brihostibarnü Maharashtra Chief Minister, Devendra Fadnavis mena aliba helicopter ka Latur district kübok Nilanga nung tsükok, saka CM den külemi mena alir shinga meyrü.

Iba helicopter nungji crew züngsem ana densema nisung trok mena liasü. Iba tayimtsüji Nilanga tesem nung anenba mapoang inzü nung kongshiba ajanga tsükok.

Iba tatalokba sülen Maharashtra CM-i microblogging website Twitter ajanga, "Latur nung onok amenba tayimtsü lendong atalok saka ni densema kü den külemi mena alir shinga meyrü. Shisabulutsü kecha mali," ta metetdaksü.

Iba tayimtsüji tanü 12:00 ako nung apusoa liasü, aser mopung melenshiba ajanga pilot-i tayimtsüji anentsü merandang inzü nung kongshi, ta ketdangser kati ashi.

Ano külen Directorate General of Civil Aviation (DGCA) nung tongti ketdangser kati, tayimtsü tera dang raksa, ta metetdaksü.

Nilanga nung osangbenertem den jembidang CM-i, "Nisung shinga meyrü. Kü media advisor Ketan Pathak tera dang yiru. Maharashtra nung nisung crore 11 temoatsü ajanga ni lendong nungi kümzük," ta ashi.

Paisa, "Iba helicopter ya tasen liasü. Onoki police dang nung iba tatalokba osang meshitsü," ta ashi.



Brussels, May 25: 2017 May 25 anogo European Council headquarter, Brussels, Belgium nung Europe nungi yimden yimsüsürtem den U.S. tir, Donald Trump (achichi nungi pongububa) senden amenba mapang tangokba noksa nung angur.

Islamic States anema raraba nung NATO atentsü: Stoltenberg

Brussels, May 25 (Agencies): Islamic State (IS) kiralongrar den US-i anir raraba nung NATO atentsü, ta US tir, Donald Trump den senden mamen tsüngta Alliance Chief, Jens Stoltenberg-i sangdong. "NATO-i kiralongrar anema raraba inyakim nung iba ajanga yimsüsüba ren nung tashi tait osang ka agütsütsü," ta Stoltenberg-i ashi.

Syria aser Iraq nung IS aser Islam nung kiralongrar telok anema raraba nung NATO-i shilem magiba indang pai jemb.

Trump US tir akümba sülen bendanglimai mezüng aoba

mapang, NATO ajanga Islam nung kiralongrar anema raraba nung shilem tajungba agütsü asoshi jembitsü atema Brussels-i aru. Trump Bodhbarnü Brussels yimti atongba sülen Hombarnü Manchester nung bomb ajanga lendong tulu agütsüba aitsü aser kiralongrar den raraba ya koktetsüla, ta ashi. NATO nung aliba linük züngsem 28 ya pei linük tenüng nung US-i anir IS anema raraba telok nung linük 60 dak tali aliba nung densema raradagi, saka Washington-i ajungshiaka NATO-i iba tentet tenüng nung shilem agia mali.

NATO-i shilem agiba ajanga rara tuluba adoka Arab limatem den tesendaktep raksatsü tetsübu agi iba telungiem nung züngsem linük France, Germany aser Italy-i bo iba maparen anema nokdaker. IS anema raraba nung busema NATO-i AWACS surveillance sentong ya tuluba kümdaktsütsü aser Iraq nung training sentong tenzüksü, ta Stoltenberg-i ashi. Kiralongrar anema raraba nung itangitertsü aser sentong yangluba nung yaritsü asoshi NATO indang headquarter, Brussels nung special cell ka tenzüksü, ta paisa shisem.

Manchester amakba indang media nung temai adoktsüba aitsür

London, May 25 (Agencies): Hombar aonung Manchester nung concert agütsüba tesem nung bomb polkoktsüba lendong nung lanur 22 poksetba indang bushisüngdangba media nung temai adoktsüba asoshi UK nung aliba US diplomat kati aitsü.

Iba bushisüngdangba maparen temai adoka porokshiba asoshi bushisüngdang asütsü aser aibelena alir merenshitsu, ta US diplomat, Lewis Lukens-i osangbener dang ashi.

New York Times ajanga iba lendong nungi ngutetba oset kar indang noksa temai adoka sayuba mechi British police aser sorkar ketdangsertem jashi. Greater Manchester Police

tem iba osang ngua kanga jashitep aser US den information lemsaba anentsü, ta osang angashi. "Iba amala bushisüngdangba maparen temai adokba ajanga takoksa tulu aser tejashi agi sünger aliba kibongtem nem tejashi tali agütsür," ta chief constable, Ian Hopkins-i ashi. Libya nungi arua Manchester nung asoba, suicide bomb pokdaksür, Salman Abedi ya iba inyakim nung dena lir, ta police temi amanger. Arishi küm 22 tain, Abedi ya tangar nisung aika den külemi mitkartemi mita repranga liasü, ta osang ajanga ashir. Iba bomb pokdaksüsang teti, arishi küm 23 tain, Ismail ya

densema nisung ti pua lir. Iba ken o nung tetsür-a ka apu saka la bo chiokogo. England chubatsür-i Royal Manchester Children's Hospital semdanga iba mozüki nung yirur alirtem aser ketdangsertem ajuruogo. Manchester Arena nung Ariana Grande-i concert agütsüba temli iba concert reprangi arurtem pei kidangi meyiba aoba mapang Abedi-i 'nuts & bolts' bomb ya pokdaksü. Tsüraburtem aser kinungertem iba concert reprangi oa aliba tanurtem ataa lia iba bomb apok aser iba lendong nung nisung 22 asü aser 116 yirua liasü.



2017, May 25 anogo Armed Forces of the Philippines (AFP) nisungtem Lanao Del Sur Province nung Maute telungpur den raratsü arudang tangokba noksa nung angur. South Philippine yimti, Marawi nung Maute telungpur 40 jungnüa atsüka aliba meindoktsü asoshi Philippine mitkartemi Brehostibarnü mita bushia liasü, ta mitkar osang ajanga ashi.

Office of the
Chuchuchuyimlang Kaketshir Telongjem
Mokokchung: Nagaland

TENÜNGSANG AGÜTSÜR

Tetetsürtem ajungketren nung len sayua, Asür Merenlemba kinüngtsü asür. PAKASENLA nüngtem nung award HSLC (Yimtsüng telong nungi tetsürtem rongnung tajungtiba marks anguba) nung takok konang Certificate den sen, mezüng Late. Sungjemzungba-er jala Kr.SENTIJUNGLA-i ngutet nung CKT-i tenüngsang agütsür. Aser iba ama sapang tajung shisashir tetsürtem nem lapoktsüba asoshi Lt. Pakasenla-er chirnur ajak dang pelaba lemsateper.

Iba den konang tulu

1. Wb. Supongmar Jamir aser Wt. Sutsungmongla tena jala Kr. Arenmenla NPSC tatitang nung Post Graduate Teacher (Class-II Gazatted) takok angu.
2. Wb. Lanumar Pongen aser Wt. Tozunglemla tena jabaso Sp. Tiasanen J.E (Telecom) North East Frontier Railway. Indian Railway Exam nung takok angu.

Ano shirnokisa pei wadang nung meranga inyaka HSLC & HSSLC takok nguogo, nenok ajak nem tenüngsang agütsüba den tarutsü mangdang tajung moajangma ta CKT mendenti ajanga pelaba sangdonger.

Sd/-
Sentiakum
President

Sd/-
Tiajungla
Information & Publicity Secy.



Madrid nungi kilometre 600 bilaa orr aliba NATO indang Moron Air Base nung India nung civilian, Suman Sharma-i raradang amshiba alima nung tayimtsü tajungtiba, Eurofighter typhoon aniba sülen tangokba noksa nung angur. Civilian rongnung lai mezüngbuba iba tayimtsü anir kümogo.

US -i Pakistan nem sen million \$190 agi tajemba teyari agütsütsü

Washington, May 25 (Agencies): Tang fiscal year mapang Trump lenisüba nung ketdangsertemi Pakistan nem taoba küm dang sen million \$190 agi tajemba teyari agütsütsü. 'Foreign military funding' sen million \$100 densema US-i Pakistan nem teyari agütsüba sen ajak agi million \$344 lir.

"US indang 'counter-terrorism' sentong, Afghanistan nung yimjung asoshi, 'nuclear non-proliferation' sentong aser South & Central Asia nung rongsen ketsüng renloktsü asoshi Pakistan-i shilem tajung agir. Iba linük nung rongsenketsüng tulu aser kanga keraa aiba ajanga US indang shishilembaba nung tajangzük agütsür," ta State Department-i US Congress nem 'annual budget proposals' agütsüba nung shia lir. Trump lenisüba nung ketdangsertemi mezüng budget yangluba nung State Department-i ashiba agi, US aser Pakistan tsüngta

tesendaktep tajung maneni alitsü asoshi maparen balala ajanga inyaktsü. "Foreign military funding' atema sen million \$225 densema taoba küm State Department indang budget nung US ajanga Pakistan asoshi sen million \$534 inokja liasü. State Department ajanga teyari agütsüba dak alaka US-i Afghanistan nung Taliban telok den raraba mapang takoksa mesüra teraksa agütsüba asoshia US-i Pakistan nem teyari agütsür. South Asia nung Afghanistan sülen Pakistan ya US nungi teyari timtiba agütsür rongnung tanabuba jenjang nung lir. Nüburtem sadoka lidaktsütsü aser tashiyim mapa inyaker Taliban aser ISIS amala telok nem memesüzükdaksüi yimjung nung alitsü asoshi sorkar aser lokdi tentet balala tsüngta tesendaktep tali yanglushija US-i teyari ya agütsür, aser iba den külemi sorkar mapa nung ochi shia inyaktsü asoshi teyari agütsür, ta osang ajanga ashi.

NFHRCC senden alitsü

Dimapur, May 25 (TYO) : Nagaland Foothill Road Co-Ordination Committee rongdak senden ka May 26, 2017 nikongdang 4:00 ako nungi NFHRCC office nung alitsü, anungji züngsem ajak medema arua adentsüla, ta NFHRCC tanü sangdong ka ajanga metetdaksüogo.

Nagaland nung kibong...

(Tapak 1 nungi...)

Iba kasa sentong nung Secretary, PHED Nagaland, Maongwati Aier, Associate Director, Tata Trusts, Biswanath Sinha; Thematic Lead, Tata Water Mission, Divyang Waghela; Commissioner & Secretary, IT Department, K D Vizo; WSSO, PHED K Ghushito; Secretary, ECS-GB member NEIDA, Dr. Chingmak Kejong; State Coordinator, SBM, Govt. of Assam, Pratul Choudhury; PHED, Govt. of Mizoram, Lalrothanga; Health Officer, Assam, Dr. Sridhar Ryavanki; OSD, SDMA, Nagaland, Johnny Asin; NHM, Nagaland, Dr. Vizovotuo Lohe aser AGM, RO -Dimapur, SBI, Thongboi Lunkim nungertemi jembia liasü.

Iba sentong nung lenir 150 shi adenshia Nagaland nung Swacch Bharat Mission takok ngua inyaktsü asoshi shisalemsatepa liasü. Iba senden nung ya Nagaland, Assam aser Mizoram state-tem nungi arua dena liasü.

Tata Water Mission / Nagaland & Mizoram (SBM) ajanga yimtsüng 400 nung kibong 40,000 repringer. Itemji Dimapur, Kiphire, Phek, Zunheboto, Mokokchung, Longleng aser Tuensang distict-tem nung lir.

Pelaba Lemsateper

May 18, 2017 nü ozü temeim ojala Asür **Süponglemia** (Mokokchung Yim) teti tatem maka anisüngzükdaki ali wadang temer aoba mapang ozü asüko nung shirnokisa nübo aser tamang sarasadem den rongsen talisa Kiyonger, Alempang Arogo, DABA, kija kibong, yimer yimsanger, anükapang, sosem tangsem, kwikati yariogo, nenok ajak dang pelaba shisemer.

Nenek mapa tajung asoshi onoki meyipa agütsüsü kecha mali saka asen tajungsang takar Tsüngremi nenok ajak molamoshia moajangma ta ozü sarasadem.



Aso : 19th Jan 1929
Asü 18th May 2017

- Chirnurtem & Semchirtem.

OFFICE OF THE MONGSENYIMTI SENSO TELONGJEM

DIMAPUR:NAGALAND

TENÜNGSANG AGÜTSÜR

All India Mixed Martial Arts Federation, AIMMAF India Amateur Nationals, Mumbai 2017 (May 13 -14) under 52 kgs straw weight category nung Wb.Imsutoshi Ozüküm'er jabaso **Matsüng Ozüküm**-i Gold Medal angutsüsa takok tulu ngutetba asoshi pa nem Dimapur Mongsenyimti Senso Telongjemi tenüngsang tulu agütsür.

Pai kaketshir telongjem aser yimtsür yimertem ajak nem konang nüngsang bener arutsüba agi sensosanger ajaki pelar.



Sd/-
(SENKATEMJEN)
President, DMST

Sd/-
(ODINUNGSANG)
Gen. Secretary, DMST

OFFICE OF THE MONGDEN YARBA JAMIR

Dimapur Unit

TENÜNGSANG AGÜTSÜR

Mr. Satemnunsang Jamir aser Lanusenla Walling-tsür na jabaso, **Mr. Zuiner Jamir**-i, 2017 HSLC tatidang nung Top 18 jenjang ngutetba den Mathematics nung mark 100 ngua konang tulu bener arutsü nung Mongden Yarba Jamir kidong-i pelar aser tarutsü nung nübur asoshi pai inyakba ajak nung Tsüngremi moajangma.

Sd/-
Mr. Tsüktinunsang Jamir
President

Sd/-
Mrs.I.Asangla Jamir
Secretary

METONGSHITSÜR

Tir Yimyim 24 May 2017 adok tapak 3 nung Poly Clinic Tuli, Loyong Ward ta alibaji **Longpong Ward** ta metongshitsür.

PELABA LEMSATEPER



I. PANGER JAMIR

Tasüba anogo : 14.05.2017

Ozü temeim tsürabur Lt. I. PANGER JAMIR mapang talangka shiranga alidang aser pa sür onok timtem jashi nung teyari nüngdaka alidang, ana aser talang nungi arua shirnokisa onok dang meima sarasadem, nübo, rongsen asere shisatsü agi yariogo, nenok ajak dang onok kinungertemi pelaba metetdaksür.

Onoki teyaritertem ajak tonga aruagi pelaba meshitetsü, ajsüuka item dang yabo pelaba shisemner :

1. Dimapur Ao Baptist Arogo
2. Management, Nurses & Staff of Dimapur Civil Hospital
3. Orential Colony Council Dimapur
4. Dimapur Longjang Senso Union
5. Revolution Club
6. Dimapur Longjang Jamir Telongjem
7. Dimapur Longjang Jamitsür Telongjem
8. 11th (buba) zunga

Nenek ajak dang onoki kanga pelar

- Kinungtsü, jalatem aser kinungertem.

Office of the LONGSA KAKETSHIR TELONGJEM

H.Q Longsa

TENÜNGSANG ASER TETUSHI AGÜTSÜR

Wadang balala nung meranga bushia inyakba den Tsüngremer temoatsü nung takok ngutetba atema Longsa Kaketshir Telongjemi item teküboklen alirtem nem tenüngsang aser tetushi agütsür.

1. Wb. Repabenba Pongen'er jabaso Sp. **Chubaaküm**-i Dept. of Chemistry Nagaland University kübok "Synthesis of activated carbon from biowaste materials and studies on their characterization and application" onük nung Ph. D (Doctor of Philosophy) degree angu.
2. Wb. P. Limawati'er jabaso Sp. **L. Longtsükümba**-i All Indian Mixed Martial Arts Federation (AIMMAF) Mumbai nung Nagaland Combat Academy nungi gold medal jenjang ngutet.
3. Wb. Toshimeren'er jabaso Dr. **Ngangshiliba**-i Wadia Institute of Himalayan Geology Dehradun nungi Scientist (B) jenjang angu. Tarutsü nunga nenok shisatsü aser sempet tajung ajanga nübur temoatsü südakjang ta asen kaketshir sarasadem.

Sd/-
Talirenba
President

Sd/-
Chubanena
Gen. Secretary

Goods And Services Tax

WORKSHOP ON GST

Date : 26th May 2017 Time: 3 PM

Venue: State Banquet Hall, Kohima

Programme

1. Welcome : Shri Pankaj Kumar, IAS
Chief Secretary, Nagaland
2. Address : Dr Shürhozelie Liezietsu
Hon'ble Chief Minister, Nagaland
3. Presentation on GST : Shri Asangba Chuba Ao, IAS
Commissioner of Taxes, Nagaland
4. Question Answer Session and Discussions
5. Vote of thanks : Shri Abhijit Sinha, IAS
Finance Commissioner, Nagaland

Refreshments

NB : All the Legislators have been requested to attend the workshop.

Issued by: DOPR

CORNERSTONE COLLEGE (ARTS)

(Affiliated to Nagaland University)

CORNERSTONE HIGHER SECONDARY SCHOOL (ARTS & COMMERCE)

DUNCAN BASTI - DIMAPUR - 797112 NAGALAND

ADMISSION DETAILS FOR BACHELOR OF ARTS & CLASS - XI (ARTS & COMMERCE)

FACILITIES:

- Experienced Faculty
- Well equipped Computer Lab with internet facility
- Library with e-book facility
- Basketball and Volleyball courts
- Indoor Stadium for Badminton & Table Tennis
- Limited Hostel seats available
- Canteen

SPECIAL FEATURE:

- Vocational Courses on skill development for students on different traits
- Spiritual and Academic Counseling



SUBJECTS OFFERED: (GENERAL & HONOURS)

ENGLISH / EDUCATION
HISTORY / SOCIOLOGY
ECONOMICS / POLITICAL SCIENCE

FOR MORE DETAILS CONTACT: (0362) 246142 / (0362) 246148 / (0362) 246149

ADMISSION FORMS AVAILABLE AT:

Cornerstone Hr. Sec. School
Cornerstone College
Duncan Basti, Circular Road
Dimapur : Nagaland

ADMISSION STARTS SOON AFTER THE HSLC AND HSSLC RESULTS

East Zone Shooting Championship atema Nagaland girls BN NCC Cadet pur shimogo



St Joesph College Jakhama nungi L/CPL Litina aye. Cadet tem prangbong akaba yangi angur

Dimapur, May 25 (Agencies): Mezüngbuba Naga (G) Bn NCC pur St. Joseph College Jakahama nungi L/Cpl Litina Aye aser Modern College Kohima nungi Sgt Adaha na May 24 nungi June 2 tashi Asansol (West Bengal)

nung East Zone Shooting Championship nung shilem agitsü asoshi shimteto. North east state 7 nungi tetsür cadet 50 aser teburtem 100 dak nung tema May 4 nungi 20 tashi Shillong Ncc Dte nung NE tenüng nungi shilem

agitsü asoshi shimba nung shilem agia liasü. Parnok rongnungi North Eastern Region Directorate NCC tenüng nung Asansol(West Bengal) nung shilem agitsü asoshi tetsür cadet 8 aser tebur cadet 8 ta shimtet.

Sudirman Cup semifinal-i Thailand, South Korea iogo



Thailand tsür Jongkolphan Kititharakul (tabelen) aser Sapsiree Taerattanachai na tetsür tarep asayadang tangokba noksa yangi angur.

Gold Coast, May 25 (Agencies): Brehostibarnü Australia, Gold Coast nung Jongkolphan Kititharakul aser Sapsiree Taerattanachai nati Denmark nung koka Thailand atema Sudirman Cup nung semi-final asayatsü asoshi maongka agütsüogo. Jongkolphan aser Sapsiree nati minute 44 agia Kamilla

Rytter Juhl aser Christinna madak 21-15, 21-12 agi takok angu. Iba takok ajanga score 3-2 kuma Thiland nung mixed team Sudirman Cup final tongtetogo. Kasa asayamong nung South Korea-i Chinese Taipei quarter-final 3-1 agi kokogo aser Honibarnü Thailand den semi-final asayatsü.

Quarter final asaya nung Denmark pur asayar Viktor Axelsen-i tebur kicha asaya akok aser Mads Conrad-Petersen aser Mads Pieler Kolding nati tebur tarep asaya koka parnok 2-1 agi Thailand nung jakdang liasü.

Ajisaka tetsür kicha asaya nung Ratchanok Intanon-i 21-15, 21-14 agi Kjaersfeldt koka score 2-2 aküm. Iba sülen tetsür tarep asaya ajanga final nung shilem agitsüba asoshi bendangtsüsa aküm, koba Thailand tsürtemi koka liasü.

Tanga tetoktepba ka nung South Korea puri tebur tarep, tebur kicha asaya aser tetsür tarep asaya koka semifinal-i iogo.

Chang Ye-Na aser Lee So-Hee nati pezübuba asaya Hsu Ya Ching aser Wu Ti Jung 21-13, 21-18 agi koka Korea pur asoshi final asayatsü atema maongka agütsü.

Hokolbarnü quarter-final asaya Japan aser Malaysia na aser China o India na asayatsü.

ICC Champions Trophy asaya sendong yamai alitsü

Mumbai, May 25 (Agencies): ICC Champions Trophy 2017 ya England aser Wales nung June 1 nungi tenzüka asayatsü sentong lir. Temaba jenjang ti nung alirtem iba asayamong nung tokteptsü aser taoba küm iba asayamong nung India-i takok marok bena lir. Anogo 18 asayatsüba tournament nung ya group ana lemsar group shia telok pezü lir aser parnok tsüngda league match 12 asayatsü. Group shia nungi temaba jenjang nung alir telok ana semi-final asayatsü aser final ya June 18 nung asayatsü.

Group A nung England, New Zealand, Australia aser Bangladesh. Group B nung India, Sri Lanka, South Africa aser Pakistan. ICC Champions Trophy 2017 anogo aser telok balala tsüngda yamai asayatsü:

Group A, Match 1: 1 June	London: England v Bangladesh
Group A, Match 2: 2 June	Birmingham: New Zealand v Australia
Group B, Match 3: 3 June	London: Sri Lanka v South Africa
Group B, Match 4: 4 June	Birmingham: India v Pakistan
Group A, Match 5: 5 June	London: Australia v Bangladesh
Group A, Match 6: 6 June	Cardiff: England v New Zealand
Group B, Match 7: 7 June	Birmingham: Pakistan v South Africa
Group B, Match 8: 8 June	London, England: India v Sri Lanka
Group A, Match 9: 9 June	Cardiff: New Zealand v Bangladesh
Group A, Match 10: 10 June	Birmingham: England v Australia
Group B, Match 11: 11 June	London: India v South Africa
Group B, Match 12: 12 June	Cardiff: Sri Lanka v Pakistan

United aser City nati pound million 1 tenla agütsü

Manchester, May 25 (Agencies): Brehostibarnü Manchester United o Manchester City nati, kiralongrartemi amakba sülen 'emergency fund' ka lapokba atema pound million 1 agütsü asoshi tezüngzüktepba agiogo. Iba lendong nung nisung 22 asü. "We Love Manchester Emergency Fund" ya Manchester Lord Mayor teyari nung British Red Cross den Hombarnü Manchester Arena nung Ariana Grande kentenba sentong tembangba sülen kiralongrartemi suicide bomb ka pokdakja liasü aser iba sülen iba telok ya tetet.

"United aser city atema Manchester ya küm 120 dak tema parnok ki ta jaa aruogo,

koba tawa lendong atalokba ajanga kanga mejungi kongshir lir. Tang iba telok ana senteper yimti yariner," ta Club anati külemi senteper osang ka metetdaksü.

"Club ana senteper teyari agütsüba ajanga lendong nung takoksa ajurua alirtem nem teyari tilaka danga agütsü imlar. Onok longjemer inyakba ajanga alima dang meraksetetba tashi aser Manchester tanüla sayutsü," ta Manchester City chairman Khaldoon al-Mubarak-i ashi.

Bodhbarnü Europa League final asaya metenzükdang Manchester united puri minute ka ola madoki aküm tetushi agütsüba sentong ka agiba den külem parnoki teka nung sü tanak mesür asaya. Iba asaya parnoki 2-1 agi Ajax akok.

World Cup Qualifier nung England telok nung Wayne Rooney mali

London, May 25 (Agencies): England telok taruba ita Scotland den World Cup qualifier aser France den friendly asaysü aliba nung Manchester United nungi asayar Wayne Rooney matentsü, ta Football Association-i Brehostibarnü metetdaksü.

Arishi küm 31 tain, Rooney ya United nungia pa jenjang sama aser Gareth Southgate indang England telok March ita sangdongba nungia züngdogogo. Iba osang sangdongba mapang pa temokok yirur liasü saka tangbo

junga kümer lir. Europa League final nung Manchester United-i Ajax madak Bodhbarnü Stockholm nung asayaba mapang takok angu, saka iba asaya nunga Rooney ya talangka masayadaksü. Aji süaka pai taruba küm Russia nung FIFA World Cup asayaba nung England telok nungi captain süa asayatsü imla liasü.

Rooney-i England tenüng nung 119 ben asaya aser iba mapang goal 53 agüja lir, saka pai England telok nungi shilem agia World Cup nung asayatsü mangdang tajemba kümdagi.

EVERYONE FEELS THE PAIN!

Oajm
FAST RELIEF FROM PAIN

A Product of LIVSAV Group
CUSTOMER CARE- 0250-6580183

BILEMDANGANG
"Timtem toushi ajanger ang tepela ajurur."